

廣州府志

ル 5  
1212  
4



門ル5  
番1212  
巻4



廣州府志卷九

輿地畧一

疆域 星紀 星  
野 氣候 都堡

疆域

廣州府在省治

東西距四百二十里

郝通志

南北距六百四十五里

張府志

東至惠州府博羅縣界二百二十里

廣東輿圖

西至肇慶府高要縣界二百里

南至香山縣前山寨三百四十里

北至韶州府英德縣界三百五十里

俱同上

東南至海四百里

大清一統志

西南至肇慶府陽江縣界五百四十里

阮通志

東北至英德縣界三百五十里同上

西北至連山綏徭廳界七百八十里府冊 廣東輿圖作至湖廣江華縣界八百八

在 京師西南七千五百七十里大清一統志

南海縣

附郭東西距一百一十二里大清一統志

南北距一百里同上 郝通志張府志並作廣一

東至番禺縣界二里廣東輿圖

西至三水縣界一百十里郭通志作一百二十五里肇慶府高明縣界一

百七十里

南至順德縣界五十里郭通志作一百里又至海一百里俱同上

北至花縣界五十二里大清一統志 廣東輿圖作至清遠縣界一百五十里 張府志作一百

里郭通志作抵清遠縣界一百五十三里

東南至番禺縣界二里張府志誤郭通志作抵東莞縣界二百九十里

西南至新會縣界一百五十里郭通志作一百九十里

東北至番禺縣界三里俱同上

西北至三水縣界一百二十里阮通志 大清一統志張府志作至清遠縣界二百里郭

通志作原抵清遠縣界二百里今抵花縣界五十六里

至 京與府治同張府志

番禺縣

附郭東西距一百四里郝通志

南北距一百五十八里同上

東至增城縣界一百二里大清一統志

西至南海縣界二里郝通志

南至香山縣界一百里

北至花縣界五十八里俱同上 廣東輿圖作至清遠縣界一百五十五里

東南至東莞縣界八十里廣東輿圖

西南至南海縣界二十里順德縣界八十里張府志 廣東輿圖作至南海

縣界十

東北至從化縣界一百四十里番禺志 廣東輿圖作七十里

西北至南海縣界五十里同上 廣東輿圖作至清遠縣界三百里

至 京與府治同張府志

順德縣

在府西南一百里大清一統志

東西距九十五里順德志作一百二里

南北距一百五十里俱同上 順德志作一百一十里

東至番禺縣界四十五里郝通志 廣東輿圖順德志作二十里

西至新會縣界五十里張府志 廣東輿圖作八十二里 順德志作八十里

南至香山縣界五十里順德志作四十里

北至南海縣界一百里俱同上 順德志作七十里

東南至香山縣界九十里順德志

西南至新會縣界六十里阮通志 順德志作至香山縣界七十里 郝通志作西南至香山

縣界

東北至番禺縣界七十里順德志

西北至南海縣界一百里同上

至 京八千二百八十五里張府志

東莞縣

在府東南一百八十里大清一統志

東西距二百五十里

南北距一百二十里

俱同上 張府志作表三百五十里

東至惠州府歸善縣界一百五十里

郝通志

西至香山縣界一百里

南至新安縣界六十里又至大洋龍穴洲二百九十里

北至增城縣界六十里

俱同上 東莞志作至增江口一百里

東南至新安縣界一百二十里

張府志東莞志作八十里至縣治一百五十五里

西南至虎門寨五十里

東莞志作至香山縣界二百里

東北至惠州府博羅縣界六十里

東莞志作至縣治一百六十里

西北至番禺縣界一百里

東莞志作至縣治二百里

至京七千九百九十五里

俱同上

新安縣

在府東南二百六十里

郝通志新安志作二百四十里

東西距一百里

大清一統志張府志作廣九十里

南北距一百里

同上

東至惠州府歸善縣界八十里

郝通志

西至香山縣界二十里

大清一統志張府志作至海通香山界

南至海岸四十里

新安志作至佛堂門

北至東莞縣界六十里

俱同上

東南至歸善縣界一百五十里

新安志

西南至香山縣界二十里

大清一統志張府志作至海新安志作至前山寨二十里

東北至東莞縣界九十里

西北至東莞縣界六十里

俱同上 張府志新安志作至虎頭門六十里

至京八千餘里

張府志

從化縣

在府北一百三十里 大清一統志 從化志作二百四十里

東西距一百二十里 從化志作二百二十五里

南北距二百六十里 俱同上 從化志作二百七十四里

東至增城縣界六十里 郝通志 從化志作東北

西至清遠縣花縣界五十里 縣冊 廣東輿圖作至清遠縣界六十里 從化志作至清遠縣

界七十里

南至番禺增城兩縣夾界四十里 張府志作至番禺縣界六十里

北至佛岡廳界一百二十里 俱同上 張府志作至韶州府英德縣界二百里 從化志作一

百五十五里

東南至增城縣界六十里 張府志

西南至番禺縣界六十里 從化志

東北至龍門縣界一百里 大清一統志 從化志作一百八十六里

西北至清遠縣佛岡廳夾界八十里 縣冊 大清一統志作至清遠縣界八十里

至京八千三十里 張府志

龍門縣

在府東北二百一十里 大清一統志

東西距二百里

南北距二百里

東至惠州府河源縣界九十里 俱同上 龍門志作二十里

西至從化縣界一百一十里 張府志 廣東輿圖作一百二十里 龍門志作一百里

南至增城縣界一百里

北至惠州府長甯縣界一百里 俱同上 龍門志作至從化縣一百二十里

東南至惠州府博羅縣界六十里 廣東輿圖

西南至增城縣界一百里龍門志

東北至河源縣界八十里張府志龍門志作二十里

西北至從化縣界一百一十里阮通志張府志作九十里

至京八千一百二十里張府志

新甯縣

在府西南三百六十里大清一統志

東西距一百三十里

南北距一百三十里俱同上新甯志作廣袤四百里

東至新會縣界四十里張府志

西至肇慶府開平縣界四十里新甯志至陽江縣界九十里郝通志

南至海岸九十里郝通志張府志作廣海

北至開平縣界四十里張府志新甯志作新會縣界

東南至新會縣界七十里香山大海二百里新甯志郝通志作東南至海

西南至肇慶府陽江縣界一百五十里大清一統志郝通志作舊海朗所城

東北至新會縣界八十里張府志新甯志作四十里

西北至開平縣界六十里新甯志作五十里

至京七千八百三十二里俱同上

增城縣

在府東一百六十二里大清一統志張府志作一百里郝通志作一百里

九十

東西距一百二十里

南北距一百六十里俱同上

東至龍門縣惠州府博羅縣夾界七十里縣冊張府志作博羅縣界六十里



廣東輿圖郝通志增城志並作二十里

西至番禺縣界六十里郝通志張府志作六十里增城志作九十里

南至東莞縣界六十里增城志張府志作至番禺縣界一百里

北至龍門從化兩縣夾界八十里張府志作至龍門縣界六十里增城志作至龍門縣

東南至東莞博羅兩縣夾界六十里俱同上張府志作至東莞縣界四十里增城

西南至番禺縣界一百三十里張府志增城志作一百里

東北至龍門從化兩縣夾界九十里縣冊廣東輿圖作至博羅縣界六十里增城

西北至從化縣界七十里張府志增城志作八十里

至京八千三百九十五里同上

香山縣

在府南二百二十里郝通志香山志作四百里

東西距二百里大清一統志香山志作一百九十二里

南北距二百一十二里同上

東至新安縣界一百里張府志

西至新會縣界一百里香山志作至鱣鱣瀝海九十里

南至海岸九十二里

北至番禺縣界一百二十里俱同上

東南至新安縣界一百四十里縣冊張府志作至前山寨及濠鏡澳一百六十里香山

志作至東莞縣界一百五十里

西南至新甯縣界一百八十里大清一統志張府志作至廣海衛三百里

東北至東莞縣界一百十里香山志作至縣治三百里

西北至順德縣界三十五里俱同上 香山志作至縣治一百二十里

至京七千八百八十五里張府志

新會縣

在府西南二百三十里大清一統志

東西距一百二十里張府志作一百三十里

南北距一百九十里俱同上 新會志作一百四十里

東至香山縣界八十里縣册 張府志作至順德縣界八十里

西至肇慶府鶴山縣界四十里新會志 張府志作至開平縣界五十里

南至香山縣界一百一十里同上

北至南海縣界八十里張府志 新會志作至鶴山縣界三十里

東南至香山縣界一百五十里廣東輿圖 新會志作至縣城一百二十里

西南至新甯縣界一百二十五里張府志 新會志作至新甯縣城

東北至順德縣界一百五十里同上 新會志作至順德縣城

西北至鶴山縣界五十里阮通志 張府志作至肇慶府高明縣界八十里 新會志作鶴山縣

城六 十里

至京八千三百六十里張府志

三水縣

在府西北二百七十里大清一統志 三水志作一百五十里

東西距九十里三水志作八十里

南北距一百六十里俱同上 三水志作一百六十六里

東至南海縣界六十里張府志

西至肇慶府高要縣界三十里三水志作二十四里

南至南海縣界七十里三水志作七十六里

北至清遠縣界九十里俱同上

東南至南海縣界五十里 張府志云縣志四隅缺

西南至肇慶府高明縣界五十里 廣東輿圖

東北至花縣界六十里 阮通志大清一統志作至清遠縣界五十里

西北至肇慶府四會縣界五十里 廣東輿圖

至京八千一十五里 張府志

清遠縣

在府北三百四十里 張府志清遠志作四百六十里

東西距二百二十里 大清一統志張府志作二百二十五里

南北距三百一十里 張府志清遠志作五百餘里

東至從化縣界一百五十里 大清一統志

西至肇慶府四會縣界七十里 同上張府志作七十五里廣東輿圖清遠志並作一百

七十里

廣地負山阻水濱際海隅郭璞謂南海盛衣冠之氣而地理

志稱番禺一都會順德平衍河流若帶東莞疆畛綿跨山海

香山外接百蠻中藏萬井新會圭峯高峙文溪縈曲三水控

扼二廣容納三江增城則龜峰矗聳增江曲流清遠踞中宿

之峽塹瀆湟之水地處上游龍門七星聳列一水縈纏從化

鳳山秀拔流溪下漑花縣岡名盤古峰稱瑞雲新安層巒疊

巘屏衛環列新甯三台迭擁於北玉峰聳峙於南此十四屬

邑臂指相聯大小相維設險固圉雄長東粵 張府志

星紀

中國當赤道之北北極常見南極常隱南行二百五十里則

北極低一度南極高一度北行二百五十里則北極高一度

南極低一度北極高度即南北里差也東西偏度即東西里

差也周禮土圭置槲為測景之法所自始然不明晷度星紀之說未詳不測實數星紀之法未密今秦蕙田五禮通考所載廣東廣州府度分乃實測之數用黜星野之談天徵信言於晷度並錄元明所測北極度分以誌緣起焉阮通志

測驗晷景元史世祖本紀

南海北極出地一十五度夏至景在表南一尺一寸六分晝

五十四刻夜四十六刻元史天文志

廣東北極出地度分二十三度明史天文志

東西偏度廣東廣州府偏西五度同上

廣東二十三度十分秦蕙田五禮通考

廣東偏西三度三十三分十五秒同上

南至三水縣界一百十里廣東輿圖

北至連州陽山縣界二百里同上

東南至花縣界七十里清遠志張府志作至南海縣界一百一十七里至番禺縣界一百里

西南至四會縣界一百二十里同上甯縣界一百二十里

東北至韶州府英德縣界六十五里張府志清遠志作一百八十里

西北至肇慶府廣甯縣界一百六十里阮通志張府志作西南誤又作至陽山

縣界一百五十里清遠志作至四會縣界一百四十里

至京八千三百里張府志

花縣

在府北九十里大清一統志

東西距一百三十九里花縣志作一百二十九里

南北距一百一里俱同上

東至從化縣界六十六里張府志

西至三水清遠二縣夾界七十三里縣册張府志作至南海三水二縣界七十三里

南至番禺縣界三十二里大清一統志

北至清遠縣界六十九里同上

東南至番禺縣界四十里花縣志

西南至南海縣界五十里

東北至從化縣界七十里

西北至清遠縣界八十里俱同上

至京八千九十五里張府志

形勝附

地總百越山連五嶺夷夏奧區德靈窟宅廣輿記

南海 二十三度十分 偏西三度三十分

番禺 二十三度十分 偏西三度三十分

順德 二十二度五十分 偏西三度四十分

東莞 二十三度 偏西三度

新安 二十二度二十分 偏西二度五十分

從化 二十三度三十三分 偏西三度十分

龍門 二十三度四十五分 偏西二度三十分

新甯 二十二度十五分 偏西四度十五分

增城 二十三度二十分 偏西二度五十分

香山 二十二度三十分 偏西三度三十分

新會 二十二度三十分 偏西三度五十四分

三水 二十三度十五分 偏西三度五十六分

清遠 二十三度四十五分 偏西三度四十五分

花縣 二十三度三十分 偏西三度三十分

康熙五十八年

欽定輿圖論北極高度廣州府偏 京師三度半北極高二十二度三分新會距府二百里低一度偏西四度二分案廣東極度皆係實測偏度以 京師子午線為中而較各地所偏之度凡節氣之早晚月食之先後胥視此

張府志

星野

十二次之名見於春秋傳國語爾雅分列宿為十二次周禮保章氏以星土辨九州之地所封封域皆有分星以觀妖祥鄭元注云其書已亡堪輿雖有所入度非古數也據此則班固漢書所稱引者亦非古數矣所以費直蔡邕分星入度二

說不同而晉書天文志採陳卓范蠡鬼谷張良京房諸葛亮譙周之說又與費蔡互異緣唐以前各宿度數推算未密故累代不同又不知歲差宿無定宮之說是以占驗有驗有不驗也

阮通志

舊志以星紀之次言之考十二分野在丑為星紀謂分星以斗牛為首日月五星起於斗宿由此以紀眾星也帝王世紀云星紀之次起斗十一度至女七度得二十九度定為揚州吳越之分蓋舉南斗牽牛婺女統吳越而概舉之至於周禮疏蔡邕費直皇甫謐晉志唐書郭守敬及今西法雖星紀之度數各殊要皆起斗至女與世紀之說並同非若爾雅杜預僅言斗牛而遺須女春秋元命苞又僅以牽牛言之也

張府志

舊通志既云諸家輿東分星屬之牛女為多乃又舉熒惑守

斗之驗以為越之分野專在于斗或以度數而論粵得南斗為多究未有定說也蓋分野之說始自黃帝其時未有吳越第舉星紀以概揚州自甘石後星文益密豈知氣凝于地而精應於天天道高且遠何能沾沾焉析度分屬哉即以粵東各郡分野志考之或屬牛或屬牛女或從翼軫或帶箕尾唯肇廣二郡兼屬斗牛女則又以吳之斗引併于越之分矣然考之古有祇以斗屬越者史記斗越分元史吳越皆斗又有直以斗牛屬越者淮南以斗牛屬越女屬吳又洪武永樂間五星兩聚斗而陳獻章出則斗原不遺于越也雖據熒惑守斗之說而兼以斗牛女為廣州分野以別于他郡其亦可也

同

南海縣附郭

番禺縣附郭

增城縣

惠州女分在增城東東莞所應其星牽牛在增城南張府志

新會縣

清遠縣

東莞縣

明統志廣州牛女之分野清類天文分野書東莞禹貢揚州之南境其次星紀其星牽牛張府志

香山縣

順德縣

葉春及順德縣志不載天文分野謂與廣州同張府志

從化縣

明統志廣州牛女分野邑屬廣州分野占星從之同上

龍門縣

廣州府天文牛女分野星紀之次大清一統志

龍門附近省會則牛女墟也龍門志

新甯縣

三水縣

新安縣

花縣

各縣分野同屬於府有謂揚州為東南而牛女在天則北方之宿毋亦星紀在北而光射于南其以吳越當之者從星紀之所燭歟張府志

日月星起於斗宿古言天者繇斗牛以紀星洪武永樂間五

星兩聚牛斗占者謂黃雲紫水間常有異人已而白沙先生出成化丙戌中星明于越之分野而甘泉以是歲生自此粵士大夫多以理學興起肩摩躡接彬彬乎有鄒魯之風廣東新語

氣候

揚粵之地少陰多陽方盛夏率一日十餘陰十餘霽雖大雨傾注頃即赫曰已復驟雨故夏之炎熱甚於北土方春時晴霽即如夏陰雨即如冬不復有韶光麗景若通四時言之夏多而微有冬春秋不復辨矣據漢書太平御覽參修

陽燠之氣常泄陰溼之氣常盛陽氣泄故四時常花三冬不雪窮臘久晴或至搖扇陰氣盛故晨夕霧昏春夏雨溼三伏之內反不甚熱夏則連陰即復淒寒比年雖無霜雪而凜烈慘悽之氣在冬末春初殊甚北人至止多有衣重裘坐卧火



炕者據黃通志郭通志廣東新語參修

南海人言海風四面而至名曰颶風颶風將至則多虹蜺名

曰颶母李肇國史補

颶莫盛於瓊雷廉次之廣又次之廣東新語

南海歲有舊風亦曰風舊蓋颶風也其起也自東北者必自北而西自西北者必自北而東而俱至南乃息謂之回南亦曰落西又曰蕩西凡二晝夜乃息亦曰風癡若不回南則踰月復作諺曰颶母不迴南再來不待三其來也必對時曰作次曰止夜作次夜止諺又曰朝三暮七晝不過日蓋其暴者不久或數時或一日夜其柔者久或二三夜有一歲數作者有三四歲不作者凡歲有一鬼打節則有一颶有二鬼打節則有二颶鬼宿打節或立春立夏等節逢鬼宿也又有石

尤風兆與颶風同但颶風起止俗謂對時石尤則畧異也他

如海氣腥亦暴風之兆又凡六月有北風必作颶諺曰六月

無閏北北風為正風舊東風為左風舊冬則又有北暴據張府志

廣東新語參修

南越志云熙安閏多颶風颶者具四方風也虞世南北堂書鈔

夏曰暴雨東北風起揚沙走石曰青凍此風之異者也其常則南風為多季冬先春而至曰送年南北風時發曰北暴以時占也潮長風起潮平風止以水占也故春至夏夏熱逾秋土石溫溼衣生白醭大抵其熱以炎蒸其寒以風雨天以陽施地以溼感是謂炎蒸其常也故曰四時皆似夏風噓雨噏雖夏亦寒其暫也故曰一雨便成冬黃通志廣州風候大抵三冬多煖至春初乃有數日極寒冬閏寒不

過二三日復煖者嶺南之常寒乃其變廣東新語

立春宜微寒諺曰春寒春暖春寒蓋南中以春寒為祥

其望春寒所以望春暖也春立春也一春之寒暖以立春卜

之立春又宜晴諺曰春晴一春晴春陰一春陰而元日則宜

微雨宜北風宜西北東北風不宜南風東風有微雨而北風

則寒寒亦為春暖之兆又以是日權水水重則雨多水輕則

雨少日直其月至十二日而止以測十二月之水旱寒故水

重水重者多雨而年豐之兆也同上

立春微雨兆有年諺曰乾冬溼年禾黍滿田各府皆然惟瓊州相反日冬溼

年乾禾米滿倉冬乾年溼禾米少粒朔日雨主一月多雨每月交二十五日雨

主次月有雨日隔月雨 春霧晴秋霧雨冬霧不寒夏霧不

暑 正月八日為穀日晴為祥雨為災 三月十六為黃姑

浸種日西南風立大雨 三月二十三為天后誕日前後必

有風雨 六月十二日俗謂彭祖忌必有大風舟行忌之

四月八日雨多則荔子多蛙而落 四月二十俗曰小分龍

五月二十俗曰大分龍皆宜雨不雨則歲歉 五月有三

卯占有年通書占歲

凡天晴暴雨忽作雨不避日日不避雨點大而疏是曰白撞

雨亦曰過雲亦曰白雨諺曰下白雨娶龍女白雨者炎熱之

氣所蒸夏閔為多其勢若暴邵子所謂火雨也嶺海炎方夏

日火尤盛故多白雨六月火在天上故先下火雨乃為水雨

而霧露也子瞻詩夏畦流膏白雨翻白雨宜早稻諺曰早禾

壯須白撞或曰色微黃且日且雨是曰黃日雨亦曰黃雨其

氣溽而蒸禾最患之故曰白雨宜禾黃雨不宜禾又早禾宜

朝雨晚禾宜夜雨廣州夏雨恆多宜早禾其或東望濃雲有雷電而雨西則否或南望濃雲有雷電而雨北則否是日分龍雨亦禾之宜廣東新語

嶺南錄云梅雨後涼風一月日舶掉風舶掉白撞之轉音也粵當五月時晴天片雲雨頃刻至者曰白撞諺云早禾望白撞翻藁望偷淋偷淋者夜雨也霜降日有風則穎不實諺曰禾忌霜降風 寒露不宜雨諺云不忌霜降風只怕寒露雨

冬有虹霞北風即起謂之攬霜風郝通志

廣州冬至不宜雨諺曰乾冬溼年禾黍滿田 元日宜微雨諺曰年溼冬乾農夫加餐 四月八日雨十四日無雨則穀多 五月朔宜雨雨則井泉浮年豐初二日不宜雨雨則井泉乾年歉五日亦不宜雨 七月七夕有雨則八月無雨處

暑無雨則白露有雨白露謂之苦雨禾沾之白颺菓生蟲

蔬菜味苦凡雨有甘苦故詩曰以祈甘雨左傳曰秋無苦雨

蓋春雨為甘秋雨為苦甘則生物苦則殺物廣東新語

每年正月阮通志二十五六七日有雨主豐六月一日有雨

主旱據明陳獻章詩註南海縣志參修

明陳獻章五月二十六日雨詩時雨時暘歌帝力今年今雨卜年豐路旁酒價知天道何處醉鄉眠此翁注民謂二十五六七日有雨主豐 六月一日不雨詩聽眼陰晴曉未分一年憂樂稍相尋山林自慣清涼極且放今朝到鑠金注民謂此日有雨主旱

廣志曰南方地氣暑熱一歲田三熟冬種春熟春種夏熟秋

種冬熟徐堅初學記

月令正月蜃氣成樓水仙來賓荷錢浮于水二麥黃木葉微脫 二月蔗初芽蔗拳輪粉魚苗出蜺降於露木棉吐英

三月杜若芳石蛙揚葩江鷗避風孔雀之尾開金檳榔包圻  
四月佛桑紅綻高榕蔭日仙掌立鯨入山麓化為虎樹蘭  
綴珠 五月荔枝丹菩提舒葉椰含漿羣蟻朝其祖鈞割鳴  
年 六月白雨足西潦至芭蕉子垂苦瓜入饌早禾乃登  
七月秧針重碧龍眼熟蝴蝶營繭素馨結為燈薤田浮 八  
月颺母息影茶徙蠅於樹紙鳶翻風黃柑分指河純乘潮而  
上 九月紅薯登白欖落嘉魚出於峽南燭迎社香門開  
十月耕牛放閔八蠶之功畢嶺梅芳橘柚錫貢銀河夜見  
十一月桃李花鷓鴣蔽葉黃雀復為魚巖蜂聚糧瑞香霏雪  
十二月蚊不絕吟池塘竭稚筍出風蘭賀春舊雷有聲

銜

廣東月令

通志云春正月桃李花盛柔桑可採二麥黃老圃種薑剪韭  
田功既興 二月雷發聲虹蜺見魚苗生蜺降于霧木棉橘  
柚華是月也農功畢作 三月溫風至梅子熟檳榔苞圻催  
耕鳴田蛙鼓吹 夏四月榴花明榕成蔭紫葢照水樹蘭綴  
珠白雨以時至 五月朱荔熟椰含漿蟬大噪鈞割鳴年早  
禾登場 六月白雨足西潦至颺母乘潮芭蕉垂荔枝早熟  
是月也新穀既登亟播晚種 秋七月秧針碧薤田浮蝴蝶  
營繭是月也暑始酷爍石流金 八月木芙蓉花梨栗熟芋  
可剝粘始獲河豚乘潮至 九月木樨瘴發紅藟登白欖落  
嘉魚出于峽大粘始獲菊有黃華 冬十月嶺梅開八蠶功  
畢橘柚垂實潮田盡登是月霜始下氣乃寒 十一月桃始  
華冬筍出楓漸丹鷓鴣蔽葉山花時茂畝田布種是月也農

斂穀屯困涸塘以漁 十二月水仙來賓梅乃大放風蘭賀

春出陽漸暢草木萌動

據金通志張府志修

順德雜志云禾蟲如蠶微紫閱以綠絲長丈餘斷為一二寸無種類夏秋間禾稻熟時每乘潮長或雨夜由田中出下海浮游則水面皆紫綠相間文成五色採者各有埠主為網巨口狹尾樹杙于海兩旁迎流取之張口束囊囊重則瀉于舟多至百益蓋萃百穀之精英故多食煖氣益人邑人常於傍晚天氣通紅半作霞色呼為禾蟲天土膏流行于地而天預兆于上是知氣類相感其候未嘗不有定也

據廣東新語五山志林參修

通志云揚越之地少陰而多陽其舒早其肅遲其氣恆煥一日之間氣候屢變炎蒸則熱風雨則寒或夏棉冬葛有之諺曰急脫急著強于服藥言風氣不時起居宜慎也

張府志

宋龔茂良詩晴雲欲午僧揮扇曉露生寒人著綿自是嶺南多氣候日中常有四時天

廣州有霜而無雪然霜亦微薄不可見秋深以木葉微紅知其為霜耳霜者白露凝戾而成廣州地煖白露出于土者難晞故霜在有無之間

廣東新語

甘蔗畏雪兼畏霜莞之霜尤薄其植獨繁於他邑嵇含云嶺外多花在春華者冬秀夏華者春秀秋華者夏秀冬華者秋秀其花竟歲婦女之首四時未嘗無花宋延清詩云南國無霜霰頻年見物華又其花大抵盛於秋冬至春初畧盡花朝但見綠葉及結子青青而已故昌黎詩云南方二月半春物亦已多

據東莞志阮通志修

廣州之虎門合蘭海每歲正月初三四五日現海市城闕樓臺車騎人物倏忽萬狀

王士禎香祖筆記

諺曰南風頭北風尾南風烈在尾北風烈在頭往往然也又

鵲巢占風巢高風小巢低風大蓋鳥得幾先畏風覆巢故以

巢之高低占風之大小據新甯志郝通志阮通志參修

凡氣候皆五嶺所同而亦微有異者南番之地多雨夏秋之

際俗號平天六月二十為分龍分龍日雨雨多而歲豐分龍

日晴雨少而歲歉語田云分龍有雨耕上山分龍無雨耕下

塘此其驗也阮通志

沓潮者廣州去大海不遠二百里每年八月潮水最大秋中

復多颶風當潮水未盡退之間颶風作而潮又至遂淹沒人

廬舍蕩失禾稼沈溺舟船南中謂之沓潮或十數年一有之

俗呼為海翻為漫天劉恂嶺表錄異

唐劉禹錫踏潮歌屯門積日無回颶滄波不歸成踏潮轟如鞭石砧且搖亘空欲駕龍鼉橋驚湍蹙縮悍而驕大陵高岸

失岩堯四邊無阻音響調背負元氣掀重霄介鯨得性方逍遙仰鼻噓吸揚朱翹海人在顧迭相招芻衣髻首聲曉曉征

南將軍登麗譙赤旗指麾不敢囂翌日風迴疹氣消歸濤納納景昭昭烏泥白沙復滿海海色不動如青瑤

南海歲有舊風障氣之患風則折木飛砂轉石氣則霧鬱飛

鳥不經自充至州風氣絕息吳志陸允傳

南海壤地坦曠山川平遠氣舒洩無瘴癘南海志

香山乃海上絕島其風氣尤異水氣蒸溼四時多熱或隆寒

見冰人輒以為雪夏日暑雨人感之者氣上壅而膚出汗一

歲之中南風為常人感溼湊理益疏然闔屬皆然不獨香山

為然也據黃通志香山志阮通志參修

芒茅菰時瘴疫大作交廣皆爾土人呼曰黃茅瘴又曰黃芒

瘴稽含南方草木狀

嶺表或見異物自空而下始如彈丸漸如車輪遂四散人中

之即病謂之瘴母

陸游避暑漫錄

廣志曰南方炎洲南氣薰數萬里為寒瘴

太平御覽

李燾云嶺南瘴氣寒熱所感邪氣多在營衛皮肉之間欲去

皮膚毛孔瘴氣根本非常山不可

李時珍本草綱目

佛山氣候於邑中獨熱以冶肆多也炒鐵之爐數十鑄鐵之

爐百餘晝夜烹煉火光燭天雖寒亦燠又鑄鍋者先範土為

模鍋成棄之名曰模泥居人取以培地築牆併治渠井土經

金火燥性不滅滲引及泉泉失其冽飲之食之易成溫結節

宣之道增涼減熱

佛山志

嶺南之霧近山州郡為多自仲春至于秋季無時無之暖極

而霧是謂南霧言南風之霧也寒極而霧是謂北霧言北風

之霧也南霧三日必有大雨或大風北霧必晴晴而自旦至

午霧猶不分暑雨衝激其氣毒淫瘴之所結瘴之起皆因草

木之氣青草黃梅為瘴於春夏新禾黃茅為瘴於秋冬是名

四瘴而青草黃茅尤毒

廣東新語

嶺南氣候若暘雨之遲早寒熱之輕重潮汐往來花果之榮

落古今一揆至於瘴癘惟瓊南尚多其餘各郡清和咸理氛

禔已消往籍之言今亦不盡然矣

阮通志

通志云嶺南之地愆陽所積暑溼所居蘊隆不宣風雨寒燠

罕應其候故蒸為瘴癘深山菁林之中香花瘴尤酷木樨開

時山嵐氣隨之而發行者聞異香出林臭如桂菊毒易中人

近海郡邑地氣稍舒風濤鼓盪諸瘴少作惟山澤間蓬蓬勃

勃鬱結如火久而不散唐宋時往往有之今瘴煙大豁險隘

盡平山川疏暢中州清淑之氣數道相通蓋調燮之功鉅矣

張府志

都堡

南海縣

謹案南海志坊十五德星貴德德新新仁中和鎮甯  
通濟城以上俱繡衣叢桂仙桂青紫揚仁陽春太平絃  
歌城以上俱廂一城西今唯繡衣叢桂仙桂青紫揚仁  
 故址略存豈當時城內外僅十五坊歟然黃郭二通  
 志皆同則相沿已久矣黃通志劉鎮居坊曰叢桂里  
 在今西城內又非城外也劉壘隱居通議張鎮孫本  
 貫南海縣城南廂相傳今狀元坊即其故里則又不  
 僅城西一廂矣然今望衡對宇連里竟街斷非十五  
 坊一廂所能罄故或古無其地而今有其名今有其

地而舊志未及詳者世遠年湮無從考證閱有附郭  
 里居各志未經覩列都堡異同分合訪古不若從今  
 起例發凡章程創具若圖甲所編便於徵賦備詳各  
 志府志一律從刪謹條其例於此

城內街四十七新城內街三十一太平門外街一百三十四  
 西門外街三十六大北門外街十三為鄉七曰西上曰豐湖  
 曰金紫曰興賢曰儒林曰梯雲曰季華為都六曰金利屬西  
 曰三江屬豐湖曰黃鼎屬興賢曰鼎安屬儒林曰泌冲屬梯雲曰西  
 林屬季華

凡六十八堡分隸督捕九江二廳金利三江神安黃鼎江浦  
 五斗口六司惟城西西隅南隅中隅北隅河泊六處統轄無  
 村不列堡外實六十二堡曰城西曰西隅以上屬督捕廳曰九江曰



大同曰沙頭曰河清曰鎮涌以上屬九江曰恩洲曰草場曰黃岡

曰豐岡曰麻奢曰白石曰桃子曰中隅曰北隅以上屬金利

曰大欖曰金紫曰駱村曰山南曰沙九以上屬三江曰泌沖

曰梯雲曰扶南曰鹽步曰大厯曰平地曰黃竹岐曰大通曰

南隅以上屬神安曰豐甯曰興賢曰綠潭曰大富曰西隆曰

大江曰張槎曰沙隄曰豐華曰大圃曰鼎安曰登俊曰土爐

曰上圍以上屬黃鼎曰先登曰海舟曰登雲曰簡村曰伏隆

曰丹桂曰礮溪曰百濬曰金甌曰吉利曰鼇頭曰龍津曰雲

津以上屬江浦曰平洲曰深村曰佛山曰疊濬曰夏教曰林

岳曰桂華曰蠅岡曰溶洲曰魁岡以上屬五斗曰河泊屬河

九江堡村四十大同堡村三十四沙頭堡村十三河清堡村

五鎮涌堡村二十一恩洲堡村二十七草場堡村八黃岡堡

村十二豐岡堡村十三麻奢堡村十七白石堡村二十六桃

子堡村十大欖堡村三十金紫堡村七十一駱村堡村十二

山南堡村三十二沙九堡村十七泌沖堡村八梯雲堡村二

十六扶南堡村二十九鹽步堡村二十二大厯堡村三十平

地堡村二十五黃竹岐堡村十三大通堡村三十一豐甯堡

村二十一興賢堡村十七綠潭堡村三十四大富堡村九西

隆堡村四十三大江堡村四張槎堡村七沙隄堡村七豐華

堡村二十五大圃堡村二十一鼎安堡即上村十登俊堡村

三十一土爐堡村四上圍堡村十六先登堡村九海舟堡村

六登雲堡村六簡村堡村二十四伏隆堡村十丹桂堡村五

礮溪堡村十八百濬堡村十二金甌堡村八吉利堡村十八

鼇頭堡村六龍津堡村十四雲津堡村九平洲堡村一深村

堡村十六佛山堡鋪二十七舊志作村十五疊濬堡村三十七夏教

堡村十林岳堡村二桂華堡村二十蟠岡堡村六溶洲堡村

五魁岡堡村九凡一千零八十九村據南海志修

謹案邨落稱名互有興廢古今遞易府志無取重編

省煩瀆也

番禺縣

城內坊一十四曰東北曰桂賢曰興賢曰聯桂曰青雲曰壽

甯曰高桂曰城南曰狀元曰泰通曰振文舊十一後定為三

日狀元日東廂二曰東城廂曰南城廂街一百十有六巷四

十二隸典史兼隸丞焉城外鄉十舊志以十都分屬之後定

為六都曰海陽曰周南曰阜豐曰務本曰甯仁曰永泰曰永

保曰慕德曰擢桂曰甯樂皆鄉名曰鹿步都荳塘都沙灣都

楊武都流溪都巴由都皆都焉永安都增設在楊武巴由之

二十里向分從化宏治七年併還堡凡六十有七曰鹿步堡

邏岡堡簕箕堡石牌堡龍眼堡黃陂堡東圃堡車陂堡小逕

堡橫江堡茅岡堡是為鹿步都曰荳塘堡檀香堡逕口堡西

塢堡南箕堡塘心堡大塘堡瀝濬堡蓼涌堡員岡堡南步堡

金鼎堡清河堡北亭堡新村堡壽山堡大石堡是為荳塘都

曰沙灣堡小龍堡茶園堡羅屋堡白石堡白沙堡坑頭堡欖

山堡大龍堡石寨堡古壩堡鍾村堡韋涌堡為沙灣都曰蕭

岡堡望岡堡劉村堡白泥堡田心堡大朗堡上大田堡下大

田堡茅山堡兩潭堡神山堡何嶺堡羅岡堡龍榜岡堡老鴉

岡堡九潭堡蚌湖堡李溪陂堡則揚武都下甸曰重岡堡竹

料堡赤逕堡太華堡為流溪都中甸曰擢桂堡紫泥堡烏泥

堡郭塘堡為巴由都下旬而河嶺堡李溪陂堡紫泥堡烏泥堡並割隸花縣曰東城水南城水西江水大山水新村水獵德水烏涌水大塘水瀝澹水檀香水沙灣水攝於河泊所官鹿步巡司攝村一百二十有一菱塘巡司攝村一百四十慕德里巡司攝村二百五十沙灣巡司攝村七十有五合計凡五百八十六村云據番禺志修

順德縣

城內縣前直街東街西街北街為街凡十東關外街三十五南關外街四十一北關外永安市街迤東街十迤西街九外鄉設都三曰東涌曰馬甯曰西淋三都堡分四十東涌都堡十二大良古樓黃連羊額江村石涌馬甯都堡十七馬甯甘黎村倫敘小灣容奇桂洲沖鶴西淋都堡十一都粘桂林竹龍落古粉雲步鼎新福岸白藤江尾龍江龍穴勒樓北水逢簡昌教馬齊

石碓登洲平步葛岸新良鷺洲龍頭

典史屬堡二曰大良曰古樓縣丞屬堡五

曰容奇曰桂洲曰昌教曰馬齊曰沖鶴馬甯巡檢屬堡九曰馬甯曰甘竹曰龍渚曰古粉曰雲步曰鼎新曰福岸曰白藤曰江尾江村巡檢屬堡十曰龍江曰龍山曰水藤曰勒樓曰黃連曰羊額曰北水曰江村曰逢簡曰石涌都甯巡檢屬堡八曰都粘曰桂林曰龍津曰甘溪曰石碓曰登洲曰平步曰葛岸紫泥巡檢屬堡六曰黎村曰倫敦曰小灣曰新良曰鷺洲曰龍頭大良堡統村一古樓堡統村二十二容奇堡統村二桂洲堡統村二昌教堡統村七馬齊堡統村二沖鶴堡統村四馬甯堡統村二甘竹堡統村二十五龍渚堡統村五古粉堡統村十雲步堡統村九鼎新堡統村七江尾堡統村七龍江堡統村一龍山堡統村二十一水藤堡統村六勒樓堡

統村十二黃連堡統村六羊額堡統村二北水堡統村六江  
村堡統村五逢簡堡統村三石涌堡統村十三都粘堡統村  
六桂林堡統村七龍津堡統村二甘溪堡統村十五石碯堡  
統村十三登洲堡統村七平步堡統村六葛岸堡統村九黎  
村堡統村七倫敦堡統村三小灣堡統村十三新良堡統村  
四鷺洲堡統村六龍頭堡統村六凡二百九十四村據順德志采訪

冊參修

東莞縣

在邑曰坊曰廂在野曰鄉曰都鄉以統都而圖戶屬焉舊有  
坊三廂一曰阜民曰桂華曰登瀛今併入阜民桂華坊內曰  
迎恩鄉四曰文順曰歸城曰恩德曰延福一都二都三都四  
都舊屬文順鄉五都六都七都八都舊屬歸城鄉九都十都

十一都十二都舊屬恩德鄉十三都舊屬延福鄉據東莞志修

城內街四十三城外街三十四捕廳管屬村莊二十二戎廳  
管屬村莊三十八京山司管屬村莊一百二十缺口鎮司管  
屬村莊一百一十五中堂司管屬村莊七十共三百六十五

村同上

新安縣

縣為鄉三為都七為村莊五百釐載舊志顧考之各都多有  
舛錯七都長山頭石潭蒲林村蓮湖一帶數十村仍入東莞  
又有新舊異名及久廢無存者尚難詳辨今考縣丞管屬自  
大鵬城內外其以村名者二十有五其地名可稽則三十有  
四而客籍村莊四十有四附焉典史管屬以村名者四十有  
六其地名可稽則十有九而客籍村莊六亦附焉官富司管

屬其村名一百八十七地名可稽則一百一十五而客籍村莊一百七十四坊附福水司管屬其村名九十三地名可稽則六十九而客籍村莊三十一均附焉案籍而稽都堡井然有條不紊計本籍村莊五百八十有八客籍村莊二百五十有五總計為八百四十三村莊詳乎備矣據新安志修

從化縣

縣城廂街五日宣順日迎春日從新日興化日會善東門內

日崇賢街北門內日振武街據從化志修

鄉分四堡日水東日水西日馬村日流溪水東在城東南方管村一百零四水西在城東北方管村七十八馬村在城南方管村一十四流溪在城北方管村一百五十一計共三百四十七村同上

龍門縣

東門城內街九西門城內街八南門城內街七北門城內街十東門城外街三十二西門城外街十八南門城外街九北門城外街二十二鄉二日長沙日開源都三日西林計三十堡十二約捕屬三十堡七約司屬五約日平康計三十一約捕屬十二約司屬十九約日金牛計八約均司屬據龍門志修

鞍曰下石泉曰上石泉以上司屬

平康都屬長沙鄉約曰西角曰東角曰南甯曰鄧邨曰崖石

曰西山曰東山曰平樂曰睦和曰陳禾曰蓼溪曰嶺頭以上捕屬

曰西溪曰上林曰雙廈曰功武曰高沙嶺曰香溪曰上下到

灘曰橫槎曰馬嘶曰油田曰學道曰鎮岡曰黃峒曰歸善曰

尚賢曰歸仁曰新陂曰藍漢曰鎮平以上司屬

金牛都屬開源鄉約曰鼇溪曰東埔曰河東曰大陂曰白芒

曰桂邨曰上龍門曰下龍門以上均司屬

林邨堡村莊四岡廈堡村莊十七晶溪堡村莊九水西堡村

莊十七詹邨堡村莊十三陳邨堡村莊十大坑堡村莊七龍

門堡村莊二十三鷓鴣堡村莊九下佛嶺堡村莊十一中佛

嶺堡村莊十六上中佛嶺堡村莊九上佛嶺堡村莊四十水

背堡村莊十五西埔堡村莊四譚田堡村莊十五鄔邨堡村

莊四蓮塘堡村莊十五第十屯堡村莊十七田尾堡村莊十

鍾邨堡村莊五羅田堡村莊十石塘堡村莊十楊田堡村莊

十六永豐堡村莊十五神賢堡村莊十三三坑堡村莊七楊

坑堡村莊十熱水堡村莊九歸甯約村莊十三甘香約村莊

十六囊窻約村莊三十六河陽約村莊十一研邨約村莊八

里田約村莊九石田約村莊七下馬鞍約村莊七中馬鞍約

村莊二十三上馬鞍約村莊十三下石泉約村莊三十五上

石泉約村莊二十九西角約村莊三十七東角約村莊十七

南甯約村莊十九鄧邨約村莊十一崖石約村莊十西山約

村莊十三東山約村莊二平樂約村莊十五睦和約村莊六

陳禾約村莊九蓼溪約村莊十四嶺頭約村莊十二西溪約

村莊十三上林約村莊八雙廈約村莊十功武約村莊十七  
高沙嶺約村莊八香溪約村莊十二上下到灘約村莊八橫  
槎約村莊八馬嘶約村莊十五油田約村莊二十一學道約  
村莊四十四鎮岡約村莊九黃岡約村莊四歸善約村莊十  
五尚賢約村莊三十九歸仁約村莊十七新陂約村莊十一  
藍漢約村莊五十九鎮平約村莊並載入藍漢約內鰲溪約  
村莊十九東埔約村莊十一河東約村莊四大陂約村莊八  
白芒約村莊十一桂邨約村莊八上龍門約村莊四下龍門  
約村莊四凡一千零七十二村俱同上

增城縣

城內坊十二城南四曰相江曰槎江曰韓塘曰慶隆城北三  
曰龜峯曰東康曰接龍城西亦三曰高賢曰儒林曰會仙城

東二曰東雷亦曰接龍城外鄉分四路東路抵博羅南路抵  
番禺西路抵龍門北路抵從化爲都十有二曰上都曰下都  
曰綏甯曰綏福曰崇賢曰甘泉曰雲母曰金牛曰楊梅曰清  
湖曰梅都曰慶福上都村四十一下都村三十四綏甯村二  
十七綏福村三十七崇賢村十九甘泉村二十雲母金牛村  
俱二十三楊梅清湖村各二十二梅嶺村二慶福村十八總  
計二百八十八村其族居著姓則九十有六康熙初英德長  
樂人來佃種未幾龍川永安人亦至當清丈時客民佔業寔  
廣益引嘉應人雜谿尚閩客民遂成土著焉據增城志修

新甯縣

城坊三歸化坊在城西門永定坊在城南門昇平坊在城東門  
城外爲鄉二曰常德曰壽甯爲都六曰德行都曰文章都曰

平康都曰姓尚都曰海晏都曰潮居都

縣治原割新會都十四里文章都十里平康都一里姓尚都

十四里海晏都十八里潮居都二里共五十九里建縣後德

行都增二里文章都增三里姓尚都增二里潮居都增一里

平康海晏二都仍舊計四都開增八里共六十七里

德行都一百六十九村文章都五十六村平康都六村海晏

都八十八村姓尚都一百零一村潮居都九村島內上川十

三村下川二十三村俱同上

赤溪堡九村田頭堡十二村漕冲堡七村銅鼓堡五村磅礮

堡四村共四百九十三村據赤溪采訪册修

香山縣

城內街十四南門外街十四北門外街十三東門外街十四西

門外街十五為鄉十曰仁厚曰德慶曰永樂曰長樂曰永甯

曰豐樂曰長安曰甯安曰古海曰潮居為都亦十曰良字都

曰龍眼都亦曰隆都曰得能都曰四字都曰大字都曰谷字

都曰恭常都曰大欖都曰黃旗都曰黃梁都良字都村三十

七龍眼都村五十八捕屬得能都村四十四捕屬四字都村十八

內惟蘇子一村大字都村二十八內惟南萌墟涌口泮沙崖

屬司屬餘俱捕屬谷字都村四十捕屬恭常都村七十九內有二十五村為上

六村為上恭常戎屬又三大欖都村五香山黃旗都村十二

十九村為下恭常戎屬黃梁都村一百九十四黃梁共五百一十五村據香山

僑立都皆以籍寄莊者有三曰番禺都皆一曰新會都皆二

曰順德都皆五同上

新會縣



附近之地不屬巡檢司者宣化源清禮義三坊所分巡檢地  
凡三東為潮陽司屬華萼歸德中樂三都與順德香山鶴山  
接界西為牛肚司屬懷仁新化遵名石碑得行五都與開平  
接界南為沙村司屬文章潮陽瀧水潮居四都與新甯香山  
接界據新會志修

縣屬三坊宣化源清禮義為捕屬宣化坊城內街九十一源  
清坊自西門外至南邊塘城內街五十四自新南門外至西

甲城外街三十五禮義坊城外街七十四

為鄉四曰崑崙縣西五里曰常德舊在縣西九十里西距羅漢山南距長沙海今割開平惟餘文章得

外四鄉統都十二曰懷仁曰新化曰遵名曰石碑屬崑崙鄉

曰得行曰文章屬常德鄉曰潮陽曰潮居曰瀧水屬壽甯鄉

曰歸德曰華萼曰中樂屬龍溪鄉歸德都領村四十一華萼

都領村二十八中樂都領村一百二十三得行都領村八文

章都領村十一潮陽都領村二十潮居都領村八十五瀧水

都領村七十三懷仁都領村十八新化都領村二十一遵名

都領村五十二石碑都領村三十一俱同上

三水縣

城內五甲有南甲小南甲北甲東甲西甲小西甲中甲小中

甲街十一曰縣前縣後縣東舊名察院街縣西俗名西便街曰學前學

後學東即南岡街曰南門街北門街東門街西門街城南外曰濠

口官路附郭鄉村五城南曰濠口鄉城東曰新村大墘山鄉

東南曰魁岡鄉城西曰白埕西村據三水志修

自南海縣分者曰西南胥江巴由三江四都自高要縣分者

日鎮南小洲平田五頂清塘長岐龍池利瓊白坭上下裕隆  
十一都戎屬鄉一捕屬鄉三胥江司屬鄉一三水司屬鄉六  
縣治東去城八里日戎屬統村三十一縣東北去城五十里  
日捕屬統村四十七三江北去城五十里亦日捕屬統村四  
十又去城十里在縣治北亦日捕屬統村二十六縣治北距  
城五十里日胥江司屬統村四十五縣治西去城五里跨西  
海西日三水司屬統村二十一縣治南跨河三里鎮南等鄉  
亦日三水司屬統村二十二又鎮南東南去城四十里亦日  
三水司屬統村九鎮南之南平田之西去城二三十里又日  
三水司屬統村十有八五頂而南去城三十五里日三水司  
屬統村十八清塘而南去城四十五里又日三水司屬統村  
十三計共二百九十村同上

清遠縣

隸捕屬者三鄉隸巡檢司七鄉為鄉十日興仁一日興仁二  
日靖定俱捕屬日太平日善化日清平俱隸迴岐司日池水  
隸濱江司日滘江一日滘江二日吉河俱隸滘江司為坊一  
為都七坊日迎恩都日後岡日龍圃日南塘日清湖日河洞  
日高灘日黃田迎恩在城內外城內街二十九城外街十一  
後岡都村一百一十三龍圃都村六十二均捕屬南塘都村  
二十五善化鄉村三十九清湖都村六十七隸迴岐司河洞  
都堡十六村九十隸濱江司高灘都村五十四又村三十九  
黃田都村四十七隸滘江司共五百五十二村據清遠志修

花縣  
城廂內外街巷南門內直街一條縣署東橫街一條署西橫

街一條北門內直街一條南門外直街一條據花縣志修

為都二捕屬獅嶺司屬曰楊武都水西司屬曰巴由都捕屬  
楊武都管積餘擢桂李溪何嶺烏坭紫坭六堡積餘堡村二  
十八擢桂堡村十四李溪堡村十一何嶺堡村二十五烏坭  
堡村三紫泥堡村十五計共七十七村獅嶺司屬楊武都管  
烏坭李溪積餘紫坭四堡烏坭二堡村十二八堡村二十一  
李溪四十三堡村四十六堡村八積餘堡村十一紫坭三堡  
村八十堡村三十六計共一百村水西司屬巴由都管蘇山  
慶豐桃子駱村華甯擢桂六堡蘇山堡村二十七慶豐堡村  
四駱村堡村十三華甯堡村十七擢桂堡村六計共七十四  
村統共二百五十一村同上

順德周寅清分纂 番禺金佑基初校 番禺史悠乾再校  
番禺史悠履三校 番禺金偉基四校

廣州府志卷九終

廣州府志卷十

輿地畧二山川

山川一

謹案山為地望川為地脈山川之著於地由來舊矣  
惟王建國畫井分疆所謂德行恆易以知險德行恆  
簡以知阻形勢一本乎自然俾求治者覽其要可以  
知阨隘識其小可以準里望觀某山之遼僻則思奸  
宄之藏觀某川之湍洄則思舟梁之便固不徒躋樓  
攀閣刻鳥雕魚自詡繪色繪聲為谿林增勝也茲取  
古之所書今之所著案縣列之如左

南海縣

劉氏山悟性寺後山南征錄謂之劉王山蓋偽劉曾作臺觀

於其山 據南海百詠修

坡山在郡城內西南隅闔之中高三四丈向在江干相傳  
晉時渡口故稱坡山古渡頭山為劉龔所鑿竟為培塿今在  
五仙觀中明洪武初行省參政汪廣洋建鐘樓其上其頂有  
丹竈其陽有穗石洞相傳石為仙人乘五羊所化裴淵廣州  
記戰國高固相楚時有五仙人乘五羊各持穀穗一莖六出  
遺穗與州人騰空而去羊化為石至今猶存有一巨石廣可  
四五丈上有胼跡跡中碧水泓然雖旱不竭似有泉眼其下  
亦一異也城中天然之石唯此餘皆咨石 據大清一統志  
郭通志郝通志廣  
東新語張  
府志參修

觸一旦自塞案羅山記浮邱即羅山朱明之門戶先在水中  
若邱陵之浮今山之四面篙痕宛然宋初有陳崇義者年一  
百一十二歲說為兒時猶見山根艤船數千今山去海邊三  
四里盡為人煙井肆之地蔣穎叔嘗作挹袖軒於其下仍記  
吳尹言為浮邱上人得道之地有雙鳥故事其為神仙之窟  
無疑矣上有朱明觀有葛洪珊瑚井洪煉丹海神獻珊瑚井  
旁有菴簽草三月上巳游人多往采擷萬曆闕學士趙志皋  
以謫官至開浮邱大社與粵中士大夫賦詩而範浮邱稚川  
二仙像祀之以浮邱公與王子晉吹笙得仙又為亭曰吹笙  
而堂曰大雅樓曰紫煙軒曰晚沐於此地一大開闢既去人  
為亭以留其舄前有撒金巷今勝跡畧存所見唯一磐石 據

地紀勝南海百詠南海古蹟記  
黃通志郭通志廣東新語參修

雙女山在縣西十五里一名鳳山宋史開寶四年潘美等伐南漢度瀧頭之險至馬徑屯雙女山劉鋹出降即此南游記今府西十七里有花田平疇彌望皆種素馨相傳南漢宮人死多葬此一名白田其地有雙女山即潘美駐師處據清一統

志方輿紀要參修

潯岡古漢尋陋之地在縣西二十九里數十峯相連形如巨

屏高六十餘丈下為沙貝村廣東輿圖

謹案南海志云史記索隱姚氏曰尋陝在始興西三百里近連口也顧祖禹方輿紀要亦云清遠縣峽山或謂之尋峽恐非即南海潯岡阮通志因舊志而謂據廣東輿圖廣東輿圖固無是語又謂廣東輿圖村名作沙目郝志作沙貝而廣東輿圖實作貝非目也

石門山在縣西北三十里高二十餘丈兩山對峙橫截巨浸據南北往來之衝屹若門闕前有控海樓漢元鼎六年樓船將軍楊僕伐南越將精卒先陷尋陋破石門得粵船粟因推而前挫粵鋒是也郡國志呂嘉拒漢積石江中為門因名石門宋德祐二年元阿里海涯遣降將梁雄飛徇廣東廣東帥徐直諒聞益王昱立於福州遣將拒之於石門為元兵所敗元史周全傳全從大軍征廣東以遊騎巡廣中過靈星海石門敵勢甚張全奮戈殺敵乘勝奪其旗鼓元時建西華寺明嘉靖中毀寺改建晉刺史吳隱之祠嶺表錄異云漢將軍韓千秋征南越全軍覆沒之地也案漢書云韓千秋兵之人也未至番禺四十里越以兵擊千秋等滅之又元鼎六年冬樓船將軍將精卒先陷尋陋破石門以此考之則石門非千秋

覆軍之處乃樓船破越之地而兩山蓋自宇宙來有是物積石之說其謬可知據輿地紀勝南海百詠廣東輿圖大清一統志郝通志方輿紀要郭通志參修

肅連山在縣西北四十五里金利都連大象山中有石洞其勢若斷若續春夏水溢與靈洲同一沈浮常欲遠於江岸者

然據郭通志大清一統志廣東新語南海志參修

靈洲山在鬱水中南粵志肅連山西一十二里有靈洲焉其山平原彌延層野極目郭景純云南海之閒有衣冠之氣者斯其地也在縣西北六十五里一名靈峯山唐十道志嶺南道名山之一也南征錄云山根如鼎足漁舟可以往來其闕西北二江之來至廣州先以靈洲為砥柱次以海珠次以海印次以禺珠皆在水中央類若地肺浮山所謂鼇峯也而靈洲尤高大其西曰象嶺曰三台南曰鹿馬曰鉢孟北為讀書

岡倫公以訓云嶺南英氣鍾於會城而秀發於靈洲其溢而出者為海珠奇觀相望以靈氣所鍾故名靈洲鬱水周連洵一方山川之勝宋方信孺有更須題作小金山之句後人因曰小金山其上有寶陀院院有超然妙高二臺其建臺不知始自何年洪武成化中先後重新之表其坊曰鼇峯勝概曰靈洲鬱水憲副徐文溥又創控海樓山下有泉曰太保泉有鎮鼇塔寺背有龍灣深不可測歲旱鄉民禱之有應山下有神鼇常風雨出沒故又名鼇峯高僧德雲示寂時局妙高臺院誠其徒勿啓俟我再來坡公過此所歷宛若曾經者手到其鑰自開恍惚前身即德雲長老也題詩曰靈峯山上寶陀寺白髮東坡又到來前世德雲今我是依稀猶記妙高臺今臺祀坡公遺像有環翠亭山下東隅海面浮生坦畝紳士公

舉東坡祀田

據新唐書地理志太平寰宇記南海百詠嶺海名勝記廣東新語方輿紀要郝通志郭通志張

府志南海志參修

金利山在縣西二十五里靈洲山西南二十五里上有崇福

寺今廢前有鑿空閣東南有巡檢司

據南海百詠大清一統志張府志郭通志參修

文旒嶺在靈洲山西北明太監韋眷員外郎張戟祖墓在焉

下有鎮龍墟淳風社學隔海突起即靈洲山山南數十丈為

鹿馬山瑤頭村環居東南迎龍蟠龍侯王古廟在焉又西南

里許為大石岡山巔列石巍峩有巨人石跡

據南海志采訪冊修

象岡亦名象嶺在靈洲山西北隔海里許明布政使盧夢陽

墓在焉由花縣了髻中洞而來表延三十餘里

大岡在靈洲山西南八里村在東南即以大岡名山麓有北

帝廟廟後為摩子巖錯生螺蜆村人每以歲正月二十六日

賽神祈子信手取之得螺生男得蜆生女極靈驗

七星岡在靈洲山南十餘里羅列拱護又南為岡美村新岡

社學在焉

俱同上

西樵山南海之望去縣西南一百二十里高聳千仞周四十

里勢若游龍盤簡村沙頭龍津金甌四堡之閒有七十二峯

奇秀峭拔挹雲霄而上之望若青蓮之花而四面方立立皆

內向諸峯大小相聯屬皆隱於削成之中又若芙蓉之未開

然者峯巒迴合千態萬狀其人處曰翳門明方獻夫砌石磴

千級行人便之山半地平有居民十三村沿溪以居或截流

以漁或築壘為塘於四十餘里閒以泛以漁隨舟所至蓋不

知山在水中抑水在山中矣山中可以種茶唐末詩人曹松



寓此嘗以顧渚法教人種茶山民至今以茶爲業其主峯曰大科亦名大觀兀然中峙爲七十二峯之冠羣峯互相聯屬內顧若羅峯上有見日臺雞鳴則日見頂逕百尺樵採有禁縉紳居山者爲祝聖之所九日游人多觴於此碧雲紫雲黃雲三峯屏列於東碧雲峯上有巨石一指觸之輒動紫雲峯狀如卓筆摩空直立在七十二峯間奇麗特絕紫雲西北爲白山峯中麓有村居松杉蔽虧林巒幽靜東爲太尉峯石陣截雲大小錯立峯最高日出銜山丹霞絢壁南爲翠雲峯一名小貴峯尖秀如削東南爲獅子峯其麓有獅子洞峯象絕肖狻猊亦一奇也磴道險仄人跡罕至前爲旋峯峯勢回旋若舞太尉峯之下爲雞鎮峯一名雞冠鎮爲睡牛峯亦稱牛眠峯爲黃旗峯峯之北有秦子嶺爲浦口四峯迤邐而東抵

於大江麓多奇石大科之南爲天峯天泉出焉飛流如練曳霄漢中下注雲谷谷中羣峯聯峙有雲谷書院白沙陳公祠今圯谷前爲蜘蛛峯深溪擁翠幽岫含雲其巔坦平可資肆望有七星巖圓峯羅列若七星然其色如丹谷左五峯曰小科峯亦雄秀與大科競曰聚雲一名齊雲曰獅腦峯下多礦獅腦之東兩峯並起爲了髻峯亦名雙髻峯爲驄馬峯有怪石崢嶸矗列如馬鬣然左五峯曰龍爪控天峯之右曰荔枝亦名雙荔曰小雞冠層厓積石嵌空標漢曰大雞冠石磴齒齒勢絕攀援凌面若躡懸梯曰玉女亦名紫姑巔有石壇世傳紫姑修煉於此石林峯穹樵采無至者其北爲西坑九龍之泉注焉度崖穿石作清淺流至山麓與玉溪合泉石益佳雲谷前有九曲溪天泉注之溪凡九折有石圓聳數仞俯瞰

澄漪兩崖紫翠重疊交相披帶下爲噴玉巖飛瀑成水簾南漢時有烏利仙蹟巖最深廣可坐百人高敞杳邃稱山絕勝下爲玉溪金銀井在焉相距百尺一赤一白世傳爲烏利仙丹井浴之可愈痼疾泉水下注蓼江出於大坑村而南入於樵湖趨於江浦海西樵南條水也大科峯西南爲雷壇峯上有雷穴禱雨輒應峯巔有壇壇畔多杜鵑春月花開如錦其前爲寶峯下有寶林洞洞中四峯環列萬木參天明尚書霍韜築四峯精舍於此今爲西莊霍公祠南有天池池上羣山倒碧萬木涵青每天欲雨中有雲起裊裊如飛絮東有玉池一名洗硯池上有石刻中爲釣臺池北有鳳來巖洞左而前爲聚仙峯世傳羣仙宴集於此遠眺長江千里如帶南下雀子峯鎮頭峯右而前爲玉案峯翠巒橫列儼如几案爲仙掌

峯奇削秀麗石上有異人跡西下千步爲鳳凰峯下爲鳳凰巖二石室峩然并列石乳倒垂飛流側注更前爲帽子峯上有碧梧峯西爲白石峯白石之下爲玉廩峯亦名禾倉峯高八百仞形如倉廩上有仰宸臺奇石突豎紫苔繡錯望之若霞峯背有池冬月不涸北爲石門洞兩峯夾峙列石如門其中石室穹窿前有飛瀑捫石而上爲仙隱巖景絕幽深清冷無暑氣東距寶林洞三里寶林之南爲聚仙臺臺在聚仙峯上巔拔地四百仞登其上長江潑澗疊巘如畫臺後列五石曰仙留石狀甚瑰異游人多宴集於此尚書王宏誨兵憲章邦翰品爲西樵第一勝處霍文敏公築亭其上曰敬亭坐臥其中松濤竹籟清韻交應東爲九龍洞一名九真洞又名九曜巖老石崛起如龍者九天斲神奇有飛騰狀其中巖竇相

通泉聲琮琤可聽。有通天巖，有門上通攀石，崎嶇而上，直繞山巔，有玲瓏巖，宛轉曲折，穿出其上，石閣高敞，有峙一石如獅，洞前爲九龍外洞，泉石尤奇。大科峯西北爲煙霞洞，兩山翼立如垣，蒼翠盤鬱，尙書湛若水卜築於此，今廢。左卽雷壇峯，曰雲路峯，迤而西爲燕巢峯，峯多古木，望之積翠排空，爲三鎮峯。山人環峯以居，林木蓊鬱，爲大燕峯，爲葫蘆峯。其下有峯，蜿蜒如蔓，長百餘丈，延於平野，右曰金鐘峯，曰鷓鴣峯，常產鷓鴣，故名。折而北爲龍泉峯，出紫石，可爲硯，及碑，有雙馬峯，雙峯串起，一澗斜趨，有瀉泉坑，洪崖架峙，陸注飛流，卽飲馬泉也。前有鐵泉巖，巖穴幽竅，好事者秉燭深入，莫窮其際，中有石穴，石筍石燕，山民常取之，下爲錦巖，闊一丈四尺，高丈餘，入可倍尋，巖下復有小巖，其石五色，若錦，有錦巖。

菴鐵泉萃其下，水簾千丈，四時若雨，與西北諸峯會於垂虹洞，亦名廣朗洞，以中爲廣朗坪也。洞後爲雲端峯，谷原沃衍，竹樹田疇，豐美饒裕。左爲大蓋峯，土色赭赤，若霞聳然，蔚秀爲長庚峰，峭削延縣，南麓一坵崛起，純石形如覆釜，是曰芝邱。右爲大良峯，爲鶴騰峯，峯形牽舉如鶴，拚飛爲象峯，形如巨象，前爲白雲峯，石勢峻嶒，苔蘚蒼潤，更前爲幡子峯，峯勢飛動，其逕如懸蛇，洞口雙瀑高懸，平曠如廣野，前有腴田百畝，溪水灣環，聯峯若圍，樹木蒙蔚，中有廣朗閣，洞口爲雲礪，卽泉流三疊，透迤而下，冰轟雷吼，倒射青冥，勢益暴烈，其陰有白雲洞，由白雲寺入，白雲溪水石多奇，沿溪渡石橋，屈折至洞口，捫磴而登，石墀平坦，容數十人，洞旁曲水可流，杯層厓飛泉，點滴如撲珠，日光燭之，璀璨奪目中，峙一巨石，曰洗

心石左壁有石室。厯石磴十餘級，始至戶牖畢具。中構石榻，臥見飛泉，洞外危橋崢嶸，石林環帶，殊極清勝。嘉靖中，何僉憲中行欲拓以居，未果。隆慶間，子亮始修而廓之。萬厯中，大學士趙澱陽志泉，卽洞前構亭曰雲瀑，建橋曰滌心，景益增。勝亭北爲香爐石，高三十仞，又百步爲逍遙臺，今名曝書臺。依峭壁而出，頂平可宴。石磴穿厓而上，險逼若懸梯。下爲白雲寺，溪水澎湃，聲聞里許。回望洞上，有觀音巖，可望不可陟。巖頂垂泉一線，涓滴不絕。大科峯北爲石泉洞，松竹蕭森，泉石幽勝。方文襄公有石泉書院，今廢。洞後爲鉢子峯，修巒平遠，蹊路下通。左爲石牌峯，多楓木，冬月經霜，葉盡赤，爲百煉峯。峯開八面，崔巍兀起，絕肖懸鐘，爲天鎮峯。四週壁立，人跡罕至，削磴回曲，猿臂相引，始能上登。右爲紫帽峯，南望白山。

若虎從空而下，爲珠峯。峯小而圓，與玉峯異嶺，同勢，離立相對。兩山之間，懸流千丈，爲金釵峯。蒼巒屹然，望之峭拔。上卽翳門關，下爲官山市。北拱爲御屏峯，列石展壁，神工鬼斧，若翠巖然。天鎮峯之下，爲吉水峯。前臨曲水，修竹茂樹，極幽勝。踰澗而北，爲小西湖。激灑滄泓，翠羽迴翔，錦鱗溯泳。方文襄公嘗構亭於此。洞西有寶鴨池，諸水皆匯於此。山之勝處也。溢爲飲馬泉，爲瀉錢泉。石澗飛流，聲若瀉錢，三折爲雙魚陂。深廣倍尋，蹲二巨石，狀如魚出，爲梅花溪。溪兩旁舊多古梅，繞石牌村，下注天湖。浩淼無涯，渟洞涵蓄，并受諸峯之水。東爲觀翠巖，度二石橋，沿溪而入。石壁峭削，積翠連空。飛泉高瀉，雲樹冥濛。雖暑月登臨，淒神寒骨。方文襄公亭其下。天湖一名小鑑湖。東北諸泉奔瀦之出，珠度坑經無底井，飛流削

崖瀑布百餘仞下為碧玉洞洞下臨峻壑隔斷塵囂自非亭  
 午夜中娥曦不曜下有消凡石石畔有流杯池洞巖石室軒  
 豁可棲前為蒲澗蒲多一寸九節附石而生洞口有怪石屹  
 立如柱其下淵然成湖石逕嵌巖不可置足後有石壁一逕  
 可循而下境最幽僻人無知者隆慶中霍君尙守闕之洞名  
 始著云其下為玉湖湖外為漱玉巖巖之下泉咽珊珊若鳴  
 珮有龍井鑿巨石為螭頭泉從口中噴出寒碧一泓澄澈如  
 鑑又轉下三百步為木鄧井仙人木鄧子所鑿水白如乳其  
 味迥異常泉西樵二十四泉唯碧玉瀑布最高而奇為諸泉  
 冠其泉北注樵湖湖起山西北環山東南隨水勢屈折而成  
 長亘六十餘里湛文簡公嘗立石標為二十八曲與弟子權  
 歌其中七十二峯可隨灣轉望湖繞山東麓出江浦南趨海

門西樵北條水也西樵志載七十二峯泉之名十惟山與水  
 相得益彰則有潭曰大珠小珠井曰金銀曰紫姑曰無底曰  
 木鄧池曰天溪曰九曲湖曰小西其一曰樵皆泉也洞之名  
 者六曰白雲曰碧玉曰廣朗曰石泉曰寶林曰獅子皆洞之  
 勝者也谷之名者一曰雲谷谷之幽者也巖之名者九曰噴  
 玉曰錦曰鐵泉曰翠曰通天曰玲瓏曰講學曰仙隱曰鳳凰  
 皆巖之邃者也臺之名者十一曰仰辰曰伏虎曰玉鏡曰聚  
 仙曰獨醒曰讀書曰望沙曰披雲曰臨翠曰鳳凰曰長春皆  
 臺之著者也石之名者八曰洞賓曰飛來曰紫姑曰神女曰  
 五指曰仙帽曰戩劍曰梁皆石之奇者也

勝記西樵山志西樵游覽記廣東  
 新語郭通志張府志阮通志參修

據交廣諸山記南  
 海古蹟記嶺海名

謹案西樵封禁採石見霍與瑕上殷軍門啓後霍尙

守勒石韓都憲祠中霍與瑕又有禱山神文諸紳士為山川完元氣為蒼赤造福祉心彌遠矣詳南海志

螺峯在簡村堡祿舟鄉形如旋螺四時草色皆青望之與他峯異說者謂高要大小凌雲嶺渡江至先登堡迤邐而來由此始達西樵故靈秀特絕其南為豹洲岡距鄉半里形如伏豹頭目宛然可辨山麓有梁振江妻何氏石坊據南海志修

吉水峯在吉水鄉鄉即以峯名峯頂周遭築牆深溝環峯下東西二石門樓猶存為

國初村人堵賊所置

騰峯岡在龍津堡龍津社學後由西樵渡海而來東麓有寶林寺其旁為良牛岡形如睡牛前為藤涌鄉有岡亦名筋竹岡與良牛岡相連古木垂蔭中多奇石其東為石岡上有石

鼓扣之則鳴

羅村岡在龍津堡羅村鄉四圍村舍環繞於東南古木參差

巖石峭削俱同上

筋竹岡在區村高數丈巔有仙人蹟鄉人禱雨輒應據郭通志修

海目山一名偶山高二十餘丈在縣西南一百四十里九江

堡大海中兩峯並立其形如目麓多奇石有芳秀亭龜石釣

臺景類金山有駕鼇小萊二峯曾偶亭別業在焉據廣東輿圖

一統志郭通志廣東詩粹參修

企籬壁一名騎鯉在九江堡大海中毗連順德新會縣界壁立萬仞深不可測山巔產奇花異草人跡罕至惟海寇及通澳私鹽奸徒藉為出入淵藪前明曾議建塔寺於其上移仰船洋哨守此惜不果行其旁曰印山亦名石灘山突起海中

據九江鄉志修

三洲山在縣西南一百七十里一名黃岡聳拔千仞周迴百餘里峯巒數十西連高明東南接新會與西樵皆為縣之鎮山其峯之奇者為石閣峯獅子峯將軍峯又有竹子嶺直走二十餘里狀如蜈蚣亦名蜈蚣嶺東為大唐坑景類盤谷

東輿圖 大清一統志郭通志參修

三山在縣南二十七里

大清一統志張府志作二十八里廣東輿圖南海志並作十八里

峯臨江並起競秀凌空舊有三山寨明廖永忠擒邵宗愚於此今為桂華堡西有天生石俗名大石鼓在洗氏郡馬功後東南有靈泉兩谷夾之泉味香冽四時不竭山麓縱廣數丈高如之郝通志作高三十餘丈頂甚寬平春晴秋爽游人多設筵其上

據方輿紀要郭通志張府志阮通志參修

西淋山高二十丈在縣西南三十里中有十餘峯延袤數里

接順德縣界其巔為鳳坑黎孝子屍葬於此其木多雷柎西

二十里有山純石曰鴉山南有碧玉池長百丈

據郭通志大清一統志

廣東輿圖佛山志參修

秀羅山在縣西南三十六里山阜奇秀草木森鬱多松蘿又

西南五里曰牛鼻山又十里曰獅雲山下有金紫堡

據大清一統志

志方輿紀要參修

謹案方輿紀要作縣西南二十七里

赤珠岡在張槎堡張槎鄉西南其旁為白泥岡綠松岡赤霞

岡鬱龍岡均不甚高峻若連若斷形家目為五星鬱龍岡乃

宋戶部尚書陳顯買地捐為義塚者

據南海志修

石雲山在佛山堡大基鋪對岸峭石林立奇岼可喜

據佛山志修

鶯岡在佛山堡豐甯鋪高可五丈許彌望田閒諸山邱僅高數尺此獨翹然曰鶯岡者以峯首昂若鶯鳴也一名鳳岡

蟠岡在蟠岡堡堡以岡得名端嚴隆滿形如圓月

塔坡岡在佛山堡者老鋪相傳得三佛像於此因名佛山今

已平為列肆

俱同上

煙管岡在林岳堡中東連和順岡茶園岡蟹岡南為大帽岡為羅坎墩西連虎岡復起為吐珠岡怪石嶙峋樹木蒼蔚三面環溪常有鄉人獵獸於此北枕黃麋河隔河有黃麋岡

蛇岡

據采訪冊修

蓮子岡在大江魁岡兩堡之閒其南麓有豐甯寺蓮峯書院內立各憲禁挖岡沙印碑碑示又東為陶師廟祀虞帝舜於其中石灣鄉三窰同建岡頂有寶峯塔其東即大帽岡又三

里為莘村岡匪徒挖沙印碑石灣諸山皆然而此山尤甚又東南四里至金瓜岡新龍岡又東南一里半為大藤社岡又東南一里即煙管岡又南即茶園岡由大帽岡東南下二里為五顯廟岡廟內有明永曆閒禁挖岡沙碑示由大帽岡東北過小帽岡歷鄧岡大杉岡蟠龍岡獅山即赤珠同河宕一村在焉

謹案紳耆擬禁石灣挖沙印碑說略載南海志

石腦岡在深村堡石頭鄉東南又名蛇山平地突起巨石長二十餘丈高三丈餘蜿蜒凹凸作蛇蟠狀上有小坎清泉注焉隆冬不竭樹木蒼鬱苔蘚葱翠宛成鱗甲山前平田數十頃中多小石坵突出如蛙蛤上有明處士霍椿林霍槩堂贈尚書霍南谷墓



龜岡在石頭鄉東北平地突起巨石週遭數百丈高三四丈  
穹窿如龜背石面縱橫冰裂作龜背紋中有數石穴清泉滿  
注冬月不竭左右樹木交蔭鳳翅岡在鄉西北有明光祿卿  
霍藻墓石人園山在鄉南有明大理寺卿闔門死節霍子衡  
父子女媳五墓

墟步岡在深村鄉聚龍里後南便岡在濬邊墟後獅頭岡在  
蔡逸士祠後

太平厓在深村堡村有巨石屹立嘉慶己巳海寇焚掠村人  
集此禦寇後寇平磨厓勒此下有碑紀其事

漩澗岡在綠潭堡紫洞鄉北岡石叢生橫枕海澗江流潑洞  
旋繞而去故名有鎮浪石傍厓特立下臨不測之淵高不  
滿尋丈而西北潦漲盛屹立波濤閱若拳足焉鄉北為亭子

岡元刑部司務羅籠建亭岡上今圯

虎石岡在奇石鄉後山巔有古松一株高數丈大十圍根蟠  
怪石有如人立者鄉人神之祠焉俱同上

王借山在縣西南六十里高三十餘丈當湏鬱二水之衝孤  
峙河干近佛山鎮與紫洞相望為土爐大江張槎佛山一帶  
保障大富環其麓山產石如劍戟然開採則盜賊頻興明御  
史屠應坤奏封之麓西北有大士關帝廟富溪書院借山古

寺據大清一統志郭通志南海志參修

黃麋山在縣西五十里東南有二巖後有石室通明可容數  
十人元末土人嘗避寇於此又西三里曰龍鬱山又西二里

曰山南鎮據大清一統志方輿紀要郭通志參修

旗峯山在縣西二十餘里沙丸堡屬為旗峯之祖形如展旗

故亦名展旗山。春夏雲霧常沒其巔，秋晴乃見三峯秀峙。其下怪石綦布，或聳或臥，砢磳離奇。惟西南隅一石名露盤，高三丈，闊如之，頂平如鏡。上有石池，深二尺許，水澄澈如甘露。雖亢旱不竭。又有仙人二拇蹟印於上，光潤滑澤，不著苔蘚。居人游玩，九日尤多。有進士何夢瑤題露盤奇曜四大字。所謂上有平石，山腰流泉，冬夏不竭者是也。側有一石，高二丈許，狀類花籃，中有凹如盂，深五寸許，有水注焉。下至山麓，為碧玉泉，週環石壁峭峻，下為展旗村。左為小馬山，右為鯉魚岡。山北隅有冷水澗，自半山噴出，始若涓滴，有山橫截，匯流而出。巨石偃臥，泉流石上，望之如鏡，傾瀉入澗，琴筑齊鳴。曲折下注，為白沙井，深二丈許，極澄潔，井底沙石可數。循山脊東北隅，為觀音巖，深八九尺，崇廣如之。石壁三面，巖內石

如砥平，上覆穹窿巨石，椽桷簷宇，髣髴象焉。巖下眾石叢聚，象童子拜狀，前里許為連珠岡，十八峯峭麗環峙，若羅漢然。巖下有清水湖，南走為大橫馬山，北走為小橫馬山，若兩馬交馳，洵一方之名勝矣。據黃通志郭通志南海志參修

郭鬱岡在旗峯山東南二里，由旗峯山東，迤邐里許至沙涌村後，上連珠岡，蜿蜒南走為松園岡，轉龍鬱岡，經灑頭岡，柏子岡，馬岡，過毬岡而來，下為大步村。據南海志修

虎頭岡在旗峯山西北三里，高百丈許，崢嶸聳峙，叢石壁立，形如虎頭，故名。山西北有石高十餘丈，形如鳳凰展翅，首尾畢肖，名鳳凰石。循山脊而南，至腰有二石駢立，高十丈許，一形如笏立，一作婦人負子狀，南走半里，即松園岡，層巒疊翠，又邇迤南來，為白鷺岡，中有大路，雙松夾蔭，嶺東舊有麥邊

村西有橋坑村今皆廢白鷺岡旋繞而西為松林岡下為大  
冲村岡之西有侍御石公祠鄉民祀之北有聖堂寺古荔一  
枝今寺廢而古荔猶存松林岡北走半里為象岡村

寶珠岡在旗峯山北五里岡之東有觀善社學十鄉同建有  
岡頭墟南走為葫蘆岡距旗峯山四里甘蕉鄉環而居焉

伴仙岡在旗峯山西北五里一名仙山中有巨石如仙翁偃  
臥仙童二捧巾拂侍焉并作天然之狀古松夾蔭之村居山

東南北三面仍以伴仙名

鹿眠岡在旗峯山西北八里形如鹿眠

芙蓉岡在大通堡海心沙上有洪聖古廟神聖岡在赤岡上  
有觀音古廟

大崙岡在鹽步堡之北表延里許左右分列如屏環抱村前

背枕石潭江北各村東為行運岡葡萄岡中為蜘蛛岡西南  
為營岡舊有觀音寺今廢

鳳嶺山在西隆堡鳳嶺頭村後山形如飛鳳矯翅故名龍王  
井山在企岡鄉西北山下流泉久旱不竭鸞子岡又名何廟

岡在寨岡鄉後龜岡在雲路橋村前豐岡在岡頭鄉外俱同上

金茅山在大圃堡興賢鄉

國初詩人吳山帶結廬於此仙人仰睡山在鄉西南界據六

集南海志參修

鳳岡在上白石堡表延五里餘形如鳳岡前居民數百家藹

吉社學在焉岡後雨過往往有石圓如卵剖之中作黃暈數

重殆非石也土人目為鳳卵云據南海志修

新村岡在磻溪堡遠脈自三水崑都山而來不與邑內諸山

相聯屬其旁為廟仔岡太倉岡豐堆岡赤泥岡下為牛過沙復起為白墳岡為金釵岡脊下而遠又轟起為望樓岡循大渦鄉之背由丹竈之白雲岡直趨孔邊方文襄祖墓在焉地名青草塍俗呼牛眠青草

石硯岡又名鯉魚岡在先登堡太平鄉之東高六七丈橫亘里餘前對西樵山後枕西江為一方勝槩鳳山在縣之西高八九丈鄉人環東南北三面而居焉又有名鳳岡者在稔岡鄉自西北綿亘而來高五六丈環抱村前後

螺岡在百濬堡吉贊鄉一名蟠龍岡村後枕山民居稠密雞犬相聞上有奇石挺出小石環列其旁曉挹宿露夕當斜陽青紫色異

虎山蚺蛇山青蛇嶺網山在河清堡仁亨村均極峭拔俱全

獅子山在郡城北一百一十里形如獅子常有雲氣覆之據府志

巍峩石在山南堡慶雲寺旁屹然數十峯有二石樓石上有平臺據南海志

烏石巖在郡城北九十里華甯境內石室高敞如閣石柱天成今析附花縣據張府志南海志參修

走珠石在廣州河南舊傳有賈胡自異域負其國之鎮珠逃至五羊國人重載金寶堅贖以歸既至半道海上珠復走還徑入石下竟不可見至今此石往往有光夜發疑為此珠之祥詩底事明珠解去來當時合浦已堪猜賈胡不省何年事老石江頭空綠苔據方信孺南海百詠修

謹案阮通志海珠寺詳載番禺而走珠石仍著南海

今從之

番禺縣

香山禺山桂林八樹在賁禺東今番禺浪水東別逕番禺山  
 海經謂之賁禺者也交州治中姚文式問曰何以名為番禺  
 答曰城東南偏有水坑音冗一陵城倚其上聞此縣人名之  
 為香山縣名番禺儻謂番山之隅也元和志云南海縣番山  
 在縣南三里禺山在縣西南一里寰宇記云番山南海縣東  
 二百五十步禺山南海縣北一里吳錄尉佗所葬黃通志云  
 番禺縣治東南一里曰番山其上多木棉其下為泮宮自南  
 聯屬而北一里曰禺山其上多松柏二山相連如城南漢時  
 劉龔鑿平積石為朝元洞後改曰清虛洞以沈香為臺觀極  
 一時之盛廣東輿圖云番山在城內東南郡學宮後有番山

亭禺山在番山北一里舊志番禺之名最古山海經黃帝生  
 禺陽禺號禺號處南海生獠梁獠梁生番禺番禺者賁禺黃  
 帝之曾孫也若中宿二禺則帝之庶子又云番禺者白雲之  
 南麓則白雲羅浮皆可名番禺案大荒東經云黃帝生禺虤  
 禺虤一作號禺虤生禺京禺京處北海禺虤處東海海內經云帝  
 俊生禺號禺號生貉梁貉梁生番禺番禺生奚仲無禺號處  
 南海之文且為帝俊子俊即舜也不出於黃帝其誤如此惟以白  
 雲羅浮為番禺為畧近之且番禺止一山不分二名酈道元  
 以番禺為番山之禺故山經亦作番禺今粵秀九眼井能通  
 石門所謂南禺水穴疑即水坑陵而吳刺史步騭擴番禺之  
 北為番禺城則當時城應跨粵秀之北故謂水坑陵為東南  
 偏也是番禺本無二山之名其分二名者後人指城中二小

輿地畧二  
 廣州府志 卷一

阜以名之耳自譙樓雙闕連西竺山至元鑿臺皆禺山也臺去禺山西北可一里方輿勝覽謂尉佗葬處蓋即舊時貢院云禺山距番山北一里山陽曰西竺山今城隍廟後邑之得名以二山也案帝子二禺之說出於譚子和海嶠志其書不傳縣志據山海經水經注以駁之是也至於指城中二培壘為番禺二山見於元和郡縣志則唐以前已有此說矣據山海經注水經注元和郡縣圖志寰宇記黃通志黃佐番禺二山記廣東輿圖番禺志張府志阮通志參修

越秀山南海志作粵秀在縣北城跨其上聳拔二十餘丈為南武之鎮城跨山腰而出下有二門左曰大北右曰小北中峯之正脈落於越王故宮山上有越王臺故址韓愈詩樂奏武王臺是也明永樂初指揮使花英於山巔起觀音閣俗呼為觀音山臺西有歌舞岡越王佗三月三日登高處宋楊萬里詩越

王歌舞春風地是也唐連帥李玘於遺址構亭鄭公愚又加脩飾在悟性寺後劉龔壘石為道名曰呼鑾夾栽甘菊芙蓉其間與羣臣游宴又名此岡曰游臺臺久廢今但曰臺岡城堞因山山分為二東為歌舞岡越王臺其西為觀音閣山半為呼鑾道山踞粵城最高處憑高下瞰遠江如帶目盡炎海粵人三月三日九月九日多游於此城堞閒多榕樹木棉制府阮元復築學海堂文瀾閣於觀音山下越王臺之西舊志云觀音閣之東北為越王臺故址即朝漢臺也臺之西閣之北為鎮海樓閣之東為應元宮下為龍王廟廟西三元宮關帝廟應元宮之東為大樹園閣之下有半山亭亭已沒有四石碣存焉亭之上有小池有水一泓雖極旱不竭南越志謂之天井岡下有越王井深百餘尺云通志南海有玉山案玉

山即今之越秀又謂之越王山後改為王山遂轉而為玉耳

昔人嘗以堯山及番禺為三山與五嶺並稱今堯山莫知其

處疑即粵秀也

據太平寰宇記南海百詠南海古蹟記黃通志大清一統志方輿紀要廣東輿圖廣東

新語王士正廣州游覽小志郭通志南海志番禺志參修

謹案阮通志云廣州記尉佗築朝臺以朝天子南越

志朝臺下有趙佗故城西三十里即圓岡傍江構越

華館以送陸賈因稱朝臺圓岡府志作固岡在北門

外朝臺在其上縣志以越王臺為朝臺誤

席帽山在雙井街高二十餘丈周六里許有兩漢郊壇遺址

成化三年邠御史韓雍立臺其上其下有蘭湖南越志番

禺北有芝蘭湖併注南海今為田沼廬里所湮不復通海其

東一里有象山又北七里為馬鞍山

黃通志

象山在席帽山東一里以形似名

張府志

馬蛟山在象山北七里相傳有蛟化馬惑人因名

番禺志

西竺山在城北四里高十丈上有廣果寺

廣東輿圖

馬鞍山裴淵廣州記曰城北有馬鞍岡秦時占氣者言南方

有天子氣始皇發民鑿破此岡地中出血今鑿處猶存以狀

取目故岡受厥稱焉漢伏波將軍馬援嘗駐兵此岡每風雨

晦暝聽之若有軍聲殷然形凹似馬鞍故名上有鳳凰嶺聳

如飛鳳其東有松柏嶺望州嶺番禺志云吳澄古跡記作馬

案山言馬伏波於此駐兵是駐兵猶案兵故以馬案名也考

新息南征未嘗東抵番禺都會恐未足據

據水經注寰宇記廣東輿圖番禺志

參修

赤石岡在州西南五里

張府志作魚珠西南五里

南越志其色若丹占氣

者謂其下有黃金扶南人欲以金萬鎰市之刺史韋朗謂南  
州之鎮弗許明天啓閒南海李待問創建浮屠於其上以鎮  
州城俗呼赤岡塔舊有文昌祠及佛寺祠寺今俱廢在城東  
南十五里

據廣東輿圖輿地紀勝  
阮通志番禺志參修

萬松山在城南十里

張府志  
作二里

隔江岸上土阜平坦其旁盧循

故城其上多松舊有乾明庵蘇軾題扁

據廣東輿圖  
番禺志參修

白雲山在縣城北十五里自大庾逶迤而來既至三城從之  
者三十餘峯每當秋霽有白雲蒸鬱而起半壁皆素故曰白  
雲其巔為摩星嶺嶺半有寺亦曰白雲左一溪曰歸龍下有  
古寺二左景泰右月溪月溪下有九龍泉流為大小水簾洞  
其北為鶴舒臺又北一里有峯曰寶象前有虎跑泉其西南  
五里有泰霞洞泰泉出焉李忠簡玉虹飲澗亭小隱軒及孫

典籍白雲山房皆廢又一里為玉虹洞其南為聚龍岡折而  
西有宋高宗御書閣又七里為蒲澗水安期舊居此澗旁有  
寺曰蒲澗前為丹井其陽有滴水巖下注為流杯池沿澗而  
南為文溪為上下二塘至山麓分流為二左曰菊湖右曰越  
溪自泰霞之北為亂石山為虎欄又東北為真武山其南七  
阜為七星岡更有鴻鵠嶺麒麟嶺松柏嶺金鷲嶺鳳凰嶺皆  
為白雲山相連亘焉省城之鎮山也山本無泉有龍化為九  
童子泉遽湧時有五色小蛇蜿蜒焉名勝記云古有七仙人  
寺後發得石履二古鏡一宋紹興閒風雨山裂又得唐天寶  
時銅鐘並藏寺中與白雲山相連曰亂石山一曰紫雲洞亦  
名白雲後洞其陰為虎欄其陽為月溪山亂石之東曰佛跡  
嶺盤石中有佛足獅子像有寺今廢嶺之東北曰真武山唐



開元中羽士林福存張府志作雅存建真武堂禱雨輒應鶴舒臺旁

又有虎頭巖宋運使陶定於半山建龍果寺題曰千峯紫翠

亭曰天南第一峯今廢蒲潤旁有蒲潤煉丹井左有菊湖今

湮據廣東輿圖廣東新語番禺志南海志郭通志阮通志參修

謹案白雲山為南越王山實省會靈秀所由融結故

南海志謂郭志魏志並詳之張府志云山雖跨南海

番禺二邑而盤踞府治東北地屬番禺較多故各通

志張府志皆以屬番禺今仍循阮通志張府志舊例

無取更張也

亂石山與白雲相連棲霞山在白雲山西南五里據黃通志廣東輿圖

真武山在亂石山東北二十里其南相對有七星岡據黃通志郝通

志參修

水簾洞在白雲山大小水簾相去三百步方信孺有詩張府志

銀坑嶺在白雲山北高峯插天綿亘二十里左右有攔灘石

左股蜿蜒而出二十里許為雞籠岡亦高聳插天東南小折

為員岡東北為龍洞番禺志

七星岡在赤石岡之南相去里許上多翠竹材中筆管名勝

志唐開元中羽士林雅存建有草堂今廢同上

鴻鵠嶺在郡北上塘村五峯騫翥如鶴沖霄張府志

金鷺嶺在府北四十里一名飛鳳嶺其山峻險中藏羣峯下

枕菱塘正德中鄉人立鎮以避寇一云在城東北又名飛雁

嶺外接洋海據方輿紀要張府志參修

謹案菱塘在城西南正接洋海此金鷺嶺在岡尾社

境內今名飛鷺嶺舊志皆誤

龍峒在縣東北五十里俗呼龍眼峒一曰火羅嶺在白雲之東突起百餘峯第二峯有巨石如豨首下有石鼎足承之可避風雨餘峯巉巖奇峭不可名狀雨時巖間有瀑布水其景最佳幽邃深險巨嶺四圍中多村居明季柵此大兵攻之月餘始拔自麓至頂皆巨石在龍眼鄉東南據大清一統志番禺志張府志參

志參

大橋山在城北十八里

張府志作城東北番禺志作火羅嶺西

其下有澗狀如

巨象垂鼻飲澗中一名象坑

廣東輿圖

蘿岡洞蘿岡舊名邏岡亦名羅岡西距白雲南距波羅後枕牛首峯前對朝冠嶺環山四面其取道出入僅四五丈許望之窈然以深中橫亘三十餘里鍾氏世居其地繁衍至四五

千人其地田狹山多居民種果為業而梅荔為獨盛夏時荔火流丹全洞皆赤有火山田巖貴味數種各墟市鬻之輒兩月餘粵之品荔枝者曰增城挂綠曰新興香荔而貴味清酣香爽尤為絕勝其名獨不傳豈遲速有時在物亦有然耶至冬梅花大開則上村下村皆然其村南嶺北嶺亦盛遊者謂層巒聳翠酷似羅浮而煙村之密果木之美過之番禺志

荔枝山在蘿岡果村鄉前距郡中七十餘里高峙雲霄登頂四覽西白雲東羅浮北帽峯南獅石虎門了然在目頂有石室可容百人室旁有塘方可二畝許土人謂先世曾效桃花源故事云山舊多荔以故得名近居民種梨尤夥春二月花開如雪溪水流悉是梨花

茗坑在荔枝山北頂平石多聳拔旁有濯雲池釣磯石俱同上

相對岡在城東南四十里兩岡相峙大江中流在冠嶺之東據廣

東輿圖番禹志參修

冠岡在城東四十里小阜平坦一名冠山在獅子嶺岡上有

北帝廟據郝通志張府志參修

瑞雲山在獅子嶺舊有隆興寺張府志

石岡在相對岡西一里頂平多石上建窳塔陂三層名蓮花

塔舊有幟云鹿步一都無進士除非石上起蓮花自立塔後

里人鍾獅丁已登進士林誕禹甲戌入翰林番禺志

魚珠石在相對岡南四面皆水中有卷石圓淨如珠北一山

象魚張口向珠因名焉陳子壯兵敗時於此被獲順治間尙

可喜築礮臺其上今廢

蓮花山山一作峯在相對岡東五里乃省龍正幹峭拔參天頂上

大石抽簪排筍鋒銳拱護如千葉芙蓉附附累萼山之得名殆以此矣一名亂石岡

大靈山在相對岡北五里高二十丈歲旱居民祈雨於山頂

三日卽甘霽滂沛無不驗者山下有梅林長十里多屬古椿

離奇拳曲花時雪英匝道芳菲襲人里人王邦畿偕陳恭尹

諸名士吟咏甚多恭尹詩所謂黃村十里梅花路花候誰能

更掩關是也旁有放鷹臺數十處皆平藩遊獵地昔兩藩怙

侈遊獵病民尙藩見老梅必督民移送府署民不堪命盡伐

其梅已濯濯矣

飛鷺嶺在大靈山東遇旱里人多於山上禱雨甚應俱同上

堯山在鹿步龍眼峒之東海中堯然而高亦名堯子峯一云

在火羅嶺去府城東北十五里荊州記云赭巖巖起冠以青

林郡國志云高千丈自番禺迄交趾俱見之此名凌山在海中舊志牽合不足據據張府志番禺志參修

謹案番山禺山堯山古名三山與五嶺並稱南海志云堯山莫知其處今據番禺志則實有其地似不必以疑即粵秀為附會矣

博大山在縣東北四十里下有銅鼎溪今堙其東有昭陵山南漢陵寢在焉一名大壺嶂在城東北與堯山相近在番禺東山有盧循母檀氏墓東南有盧焮循浮海與吳隱之戰立烽焮處山下溪有銅鼎唐劉道錫刺廣州遣人繫鼎引出鼎耳斷鼎沒執緯者耳盡痛據吳澄南海古蹟記大清一統志參修

盧侯石在府東南二十里曰盧侯石者相傳吳隱之與盧循戰處一名南箕石又作盧焮石在江濱亦名南箕臺據張府志方輿

紀要阮通志參修

石壁山在城西南二十二里迤邐二里許高五丈餘去城南三十里一名神頭岡奇石嶙峋連綿數里石齒齧立橫枕江流上有文筆石關帝巖懸崖上有仙迹石下有飛來石立於石峯之上潯州守李翱築釣魚臺於此歸隱焉一名夢鶴巖邑貢生馮異詩所謂雲深夢鶴人何處也據廣東輿圖番禺志參修

三台山張府志作岡與石壁山相連上有李忠簡祠學士黃佐為之序番禺志

海心岡一名日月山在蓼涌員岡海中與七星岡南北相對屹立高十餘丈廣里許草木翳茂隔溪復一小岡亦在海中岡北岸劉王古塚在焉舊有南北二亭相對南漢設立守塚戶故有亭今亭已毀而南亭村北亭村居人萃處張府志

雷峯山在城東南五十里高十丈前為海雲寺在海心岡之西屹立于田中秀麗高聳相傳昔時在大海中山前有觀音廟昔賈胡馬羅連阻風於此祈神得無恙後數年復至為脩廟召僧更名隆興寺今僧稱為開山主順治閱寺僧金湛迎函是禪師說法廣建樓殿鏤大佛高丈餘更名雲海寺遂成叢林稱粵東名刹云

據張府志番禺志廣東輿圖參修

象山在雷峯之西山形如象故名上多古松中有先鋒巖樹林陰翳山石嶙峋北枕大河里人競渡最為勝會

番禺志

三老峯在雷峯之西南北御屏岡為員岡鄉御史崔廷圭建門樓坊額云瑞接三台即此上有飛仙足跡鑿之復完其下有三味泉焉足跡旁有石中窪圓如鉢深八九寸中一小孔湧泉不竭其味甘美俗謂仙人水碗也在菱塘

據張府志番禺志參修

煙管岡在三老峯之東高大十倍於雷峯登雷峯望之如在海中蓋海岸山也村落環其下李屈劉黃諸大姓聚焉元末義兵元帥屈大舒起兵保障邑里築煙臺其上因名子孫世居其下在菱塘新廳鄉高百餘丈又名冠山上

同上

花山岡一名嵩山與煙管岡相去二里高大與煙管齊土人傳二山昔在海中相與競高花山一夜高竝煙管神人怒而蹠之至今山北大石上足掌跡存焉據此則巨靈擘華不虛語矣

番禺志

大鎮岡在花山岡之西相去十里高百餘丈橫三百丈羣峯相湊怪石崢嶸中有一瀑飛流二十餘丈小峯側注偃僕如人前俯陂陀俗以為漁翁織網矣

謹案大鎮岡周六里山麓為山門鄉李姓聚居山頂

虬松偃蹇有大石擊之則鳴鄉人禱雨輒驗俗呼祈雨塘山足有泉名清水潭實無瀑番禺志誤也

鯉魚石與山門鎮岡對峙平地突起數石嶙峋次隱約欲動左爲大社壇松林陰翳右爲茂嶺峯峯下建觀音堂文武廟南海神祠相去里許卽金鵝嶺俱同上

謹案此地名岡尾無所謂鯉魚石者其與山門鎮岡對峙者爲了髻嶺又南爲大高巖又南爲小高巖又南山脉盡處爲岡尾南海神祠建焉西爲觀音堂東爲文武廟外爲社壇壇後爲珠聯岡岡尾十八鄉之社學也咸豐六年土賊平鄉人於珠聯東建岡尾書院樓上祀奎宿堂中奉前邑令濟甯李公福秦祿位吏部主事李光廷有碑紀去思焉由小高巖之脉支

分東北爲花山煙管諸峰則深水社十七鄉聚居之地社學西南金鵝嶺今名飛鵝嶺其上有堂帽嶺此別一支亦與鎮岡對峙相去可五里番禺志亦誤

礪山在縣東南八十里屹峙海旁高二百餘丈綿亘四十餘峯爲虎門捍山一名獅石山以東有石壁峻削狀如獅子故名一名石礪山在金鵝嶺東一里廣袤十餘里四周皆海屹峙中流下卽獅子洋獅腹中空可坐六七人飛泉百丈一巖名錦廊石如迴廊可百餘步遊客坐列飛瀑濺人衣袂明時有監生冒認稅山招商採石萬厯四十年邑人李惟鳳等告官封禁建浮屠其上高九層今呼石礪塔山在琶洲之下虎門之上康熙三年徙海民於內地劃山屬禁界外設立磚城名蓮花城其後土棍結連奸商恣行挖鑿乾隆二十九年邑

人凌魚等呈請兩院行司禁止採石勒碑一暨蓮花城一暨

府學內據大清一統志番禺志參修

抱旗山在城南八十里高二百餘丈周十餘里勢如抱旗以形勢名山下江水環繞人不可登上有古烽埃南有南山峽屹立江濱東二里曰文筆峯與府治相對大夫山即抱旗山俗呼為大鳥岡音之訛也在沙灣司屏山前高削千仞橫亘數里為郡前鎮山西北兩江鎖鑰上有仙姑石鸛鶴石南為離明洞東西二溪東曰自愛西曰宜人多古松最高處曰文筆峯其北屏山有仙人簡雲顛故居鄉人為祠祀之其東曰獅嶺下有福泉據廣東輿圖黃通志阮通志張府志番禺志參修南山峽在抱旗山之南三里石壁相峙珠江貫其中番禺志羅山在龍灣之左去南山峽西二里相傳唐時有羅真人脩

煉於此仙去因得名真人一云羅公遠一云羅子房張府志

青螺嶂在城南四十里嶂高五百丈一名白鹿岡相傳劉龔時獲白鹿於此其下沙灣之水出焉郡國志廣州南四十里有白鹿岡在南山峽之南三里去城六十四里又名白鹿岡土人時見白鹿出沒岡頂邑人馮祖裘建白鹿社焉昔王漸遠家其闕故以青螺自號青螺今作青蘿南迤則曰南屏山俗呼南牌頭峭石叢立上有逍遙臺下有沙灣水水中有九牛渡江石在番禺沙灣鄉有葛洪弟子黃野人煉丹處據一簣山

房集廣東輿圖黃通志龔宇記張府志番禺志參修

唐山在抱旗之南與青蘿嶂相連以唐仙得名也在沙灣上有三光巖日月巖字皆磨崖鐫勒昔有唐不語者不知何許人兄弟五人煉丹此山仙去至今井竈具在遺薪化為蚱蜢

形扁如腐草動之即飛去取藏書帙中數歲猶生巖內有小

石人以爲唐仙也輒酌茗祝之張府志

毘旗岡在城東八十里張府志波羅廟之東下爲波

羅江高可五六丈全體皆石在水中祀神則建旗其上據張府志

廣東輿圖參修

尉遲巖在洪聖廟後五里高數丈中有石室旁有清泉番禺志

龍頭石與尉遲巖相連上多飛瀑多怪石俗傳羅隱鞭石填

海與海神約鷄鳴即止神假鷄鳴石即不行此山萬石鋒厲

向前似有奔注汪洋之勢語出齊東亦錄之以與祖龍之鐸

相爲對偶案羅隱不第後東歸終於吳越時宇內瓜裂無由

南客粵東而廣惠閩傳羅隱仙蹟甚多又邑南羅山以羅真

人得名謂羅公遠羅子房皆疑以傳疑也番禺志

帽峯山在慕德里司路險境僻人跡罕至梅田諸村遠居其

外萬木叢翳上有帽峯庵地接增城從化環山居者華坑沙

田良坑高田清水逕諸村據番禺志採訪冊參修

葫蘆山蓮花山發脈與帽峯山分擘環山居者有陳洞蘇洞

龍田諸村山腰有古愚寺脈結大羅村小羅村白沙塘大綱

嶺龍塘虎塘等村采訪冊

尋嶺與帽峯山葫蘆山品字相峙若三足鼎立環山居者有

蓮塘坑邊茅岡等村由蓮塘過脈結馬洞秀水長沙埗由茅

岡過脈結九龍莊障岡由茅岡上手穿田再結白兔莊梅田

良田竹料等村

武台山在帽峯東上有武台寺環山居者爲黃田燕塘山龍

等村俱同上



順德縣

山自番禺來者抱旗山度海而西爲三桂爲大小龍頭至於都甯最高逆魚塘之渚爲縣北障東南至桃村橫岸西過疊石海爲壑邱東南至於大洲又南至雞洲又東南爲三欄壑邱而老鴉岡差大過三江瀝崧而起爲神步爲太平屏縣東南蔽香山汪洋浩淼之水折而西列障而東趨爲黃榜爲金峯爲古樓東過碧鑑海入大良爲鳳山自古樓而西爲官山爲永安爲躍龍南爲金釵又南爲桂山東爲獅子又東爲雁塔南爲容爲奇傳於海其西淋山則自南海林岳而度在龍頭山北自爲一支新會來者一自繼龍江左支東渡海爲石壁爲瓜洲皆峙海中石壁卽企犁壁也至甘竹激爲灘灘南爲象山北爲龍應又北爲大金爲鳳凰爲玉麟伏而起二山

北奔爲尖岡度梅家山爲天湖東北爲柏山西爲飛鳳龍江山脈由此而始一自銀瓶嘴東度仰船岡南過馬甯崧而起爲龍頭東南爲頓龍爲聚星東北爲月角傳於海一自天河渡草鞋洲爲星槎西南順風最秀東爲蓮花又東爲定山東南至蓬壺至江尾火號山傳於海白藤馬鞍諸山則自橫江豬頭岡而渡水自滇陽來者至南海西樵下歧而二西一支自葛岸入至水藤爲河彭海至黃連又分爲二支爲三漕海北支東過黃連羊額倫敦黎村之北鷺洲新良桂林之南直都粘爲疊石海東過紫泥南過老鴉岡至小灣入香山海南海南過馬齊沖鶴之間環大沙尾又南過昌教爲橫流海西則木頭海達馬甯東則青步海達桂洲容奇入香山海黃連

之別為鱗魚海南過江村為北笊海又南過古樓石涌之間  
為金斗海又東過容奇小灣之間為北潮海東入香山海鱗  
魚海東過倫敦分為二東桂畔海西碧鑑海轉而南為鐵船  
海環大良出神步太平之間會於老鴉岡為三江瀝東南入  
香山海大沙尾別過沖鶴會金斗為羅江海西樵下東一支  
至平步又分為二南支過鷺洲北為庚流海東過新良東南  
過桂林都粘之間為魚塘海南入壘石海庚流海別至鷺洲  
南為均沙海平步北支過南海瀾石村東至登州又分為三  
南支入庚流海中支至過甘溪南又分為二其南過龍津會  
魚北過龍津東至龍頭入番禺海北支至甘溪北又分為二  
其南會龍津北其北遠西淋山東南會於龍頭由五斗口至  
廣州由石灣逕至石碯皆自甘溪北往牂牁江出羚羊峽經

南海九江汪洋而下一自甘竹灘入為獅嶺海逆至勒樓上  
接三漕下通錦鯉為三合海獅嶺海別至龍山龍江一自三  
瀝沙分三支東支過福岸為福海過馬甯而南為馬甯海又  
南為木頭海中支東南過雲步又東南過鼎新江尾為渡江  
海南入香山海西支遶白藤而南入新會海其仰船岡入甘  
竹為第七滘南過光華為沙背海又南過龍渚馬甯之間至  
昌教為洪濛海入橫流頭海東過光華為九曲海又東過北  
水古粉之閔入錦鯉海順德志  
倪尚忠雙塔記云太平山自古樓連亘聳拔為諸山最數峯  
奔騰逆上為神步山邑人鄭際泰鐘樓記云大小嶺自青蘿  
山涉海而來逆流數里起伏數百峯西行而北旋東渡水而  
起鳳山融結於中山梯雲之閔而邇來講輿地者謂邑城龍

西自鶴山崑崙發脈委折至大雁挺拔磅礴鬱為一方之望東分一脈蜿蜒渡海起為甘竹象嶺諸山東出仰船岡橫展落平伏行至逢簡微露石跡穿錦鯉海至連杜等村數山斷續透迤復渡金斗聳起聳龍岡東北厯數折至梯雲穿田頓起煙壑岡卸脈過碧鑑海金榜山旋折為鳳山橫開蓋帳散布五山登俊錦巖環於北梯雲東列華蓋南朝而屹然中峙者中山也東龍則自番禺大箍圍起祖數十頓跌至青蘿幃分脈渡海卓立太平大嶺諸峯散落小灣沙頭岡巒磊落紆迴與古樓飛鷺諸山齒牙交錯以壯形局其神步山脈則來自都甯山逾疊石海厯喜涌大洲雞洲諸鄉整阜相連起伏不一藉為外沙以固內局蓋縣城三龍盤結山水灣環遂為嶺表鍾秀之地其說並存著之以告來者同上

謹案順德志山川合言形勢具悉而起祖行龍之說言人人殊今亦附記如右

中山一名安東山在縣治後高約十餘丈周一里下有雨花洞據阮通志順德志參修

梯雲山一名迎暉山在縣治東南學宮之左高十六丈周一里梯雲書院建其上右為文昌祠

華蓋山在城南半里高約十三丈周二里與中山梯雲拱北登俊諸山疊若五星亦曰五峯下有碧華洞俱同上

拱北山在城北一里為縣北鎮高約十餘丈周里許相傳昔有仙人往來中有石巖曰錦巖又名龍巖全體皆石峯崔嵬其巔寬平如砥可坐數百人桂畔海會其前石湖旋其後月明籟靜尋幽者多挈榼攜壺觴詠於此四旁石隙雜產花

卉清芬襲人嶺南名區也峭壁有唐人羅隱題穩樂字南宋時鄉人倚石壘為臺基崇巖之半厯階而上列楹為二廟右曰東廟左曰西廟頂有石平整稱仙人床石左舊有二寺名曰東菴西菴僧多卓錫焉今圯東菴下為讀法之所據郝通志輿地

記略順德志參修

登俊山在城北半里高約十餘丈周二里順德志云中山在縣治後梯雲在學左皆今城內山也登俊在城北半里拱北又在其北華蓋別在城南半里皆城外山也方輿紀要諸書所稱五山即此而鳳山之為城跨界城內外轉不與蓋未設縣時五山分峙如五星各自為起止與他山之蜿蜒數峯者不同今雖為一城所閼而形勢固自釐然也據郝通志阮通志參修鳳山在縣治西又稱西山高約十五丈周七里前曰金榜城

跨其上游隱堂羅務光修煉於此下有紫霄圃煉丹井遺蹟具在焉案西山疊石數仞之折而上山下迤西有龍潭遂名山曰龍巖然輿地志錦巖志略並以屬錦巖非縣治近鳳山即混鳳山作龍巖也據廣東輿圖順德志參修

神步山在城東南四里自城東門外循桂畔海旁來鷗社渡河一望皆田畦東南築路十里曰青雲路中溪流斷處架橋凡八窈千松蒼翠葱鬱路盡而山山有巨人跡怪石嶙峋若獅象龜魚為狀不一數峯奔騰逆上明萬厯間知縣倪尙忠以縣城三面包蓄惟東隅虛卸補築是路復於山上建文塔銅柱直貫塔巔銘曰太平山名卓爾神步夾之二水交匯捍門在茲金盤寶峯光炫聲馳大魁天下翼我皇禧塔高十有二丈七級級有扶欄可登覽八角皆鐵鳳銜鐘風來聲聞十里

塔下有祠曰寶月宮祀觀音曰文昌閣下豎石為坊榜曰三元再下又旁築一路直抵海濱即今所稱龍鬚路也山既奇秀加以樓閣點綴實為邑中第一名勝據大清一統志阮通志順德志參修

永安山在縣西二十四里高約十餘丈周三里有奇臨大演

海據大清一統志順德志參修

官山在永安之西張府志作山在古樓西臨金斗海大清一統志

龍躍山在永安之南又東南為擁節山為石岡採訪冊作石龍岡順德志

黃榜山舊名金榜張府志阮通志作舊名金榜城在城南九里張府志作城西南九里

高約三十餘丈周七里今日飛鷺以形得名東為蛇岡為龜岡又東為鹿岡據順德志采訪冊參修

金峯山在黃榜山西北其南為大范小范又南為大富西為盤龍

謹案 大清一統志云金榜山其北為金峯順德志云金峯在金榜東以地圖案之實在西北

三桂山在金榜東北西為靈龜北為大象東為睡犬為梯雲迤南諸山為插旗為渴馬飲泉東為睡木為細岡

珮岡在梯雲東臨碧鑑海北為煙壑又北為牛山羊山為天馬城西里許有山天馬迴抱縣城前此嫌其馬首向外故掘斷之因而頽壞成破軍形前臨碧鑑上流對面新鑿一涌通倫教海曰新濬後加塌卸乾隆庚午邑令陳志儀倡捐鑿三

河培補天馬云俱同上

太平山在城南八里阮通志作東南上有峯曰拖鎗曰大嶺曰二嶺

下有日靈龜出洞圓螺吐肉者象形也連巨聳拔為諸山最  
縣之南屏諸山之祖也與神步山隔河南北對峙縣治左右  
兩水分流環抱而合於兩山之麓形家所稱水口是也知縣  
方學隆建塔其上名太平塔有燧堠可望香山東莞三山大  
洋銀濤拍空西樵羅浮諸勝隱隱在目下有周鑑井其南為

睡牛 據阮通志 大清一  
統志順德志參修

鐘鼓山在縣南六里 阮通志  
作二里 在太平之旁下有巖為近郊之

勝 據方輿紀要  
順德志參修

大馬鞍山在太平西南其南為紗帽為飛鷺西為五腦芙蓉  
南為小馬鞍其又南為烏豬東為龍逢又東為圓頭岡 順德  
志  
馬嘶園山在紗帽東其東南為大鐘東為鹿秀園為董園為  
後元武南為二鐘三鐘為巨靈呵護東南為真武大座為龜

為蛇為連龍東北為飛鳳為金龍

科場岡在太平西其南為雞姆坑為王字龍為相公岡北為  
仙人大座為回龍顧祖為豬腰西為谷子園飛鼠嘴又南為  
蛇為月 俱全  
上

雁塔山在城東南十五里高約二十丈周六里又南半里為

容山在小灣南 張府志作在  
古樓西誤 少西為奇山 據廣東輿圖  
清一統志順德志

參修

馬岡在村前村以山名 順德  
志

金釵山在城南十三里容奇二山之間馬岡之陽青龍鳳凰

罷織鐵鷺鍾秀瀛洲鰲洲石歧諸山環繞高十餘丈周四里

據廣東輿圖 大清  
一統志順德志參修

翠竹山在城南十六里上多產竹其東為獅子 郝通  
志

扶甯山在翠竹之西其南為桂山順德志

龍頭山亦曰龍馬在城西南三十里大清一統志作城西蜿蜒最秀

龍潭之水出焉其西為馬登東為頓龍南為象上有新婦石

下有馬鼻巖順德志作馬鼻石明鄒智常鼓柷遊此故稱為泊鄒崖

據郝通志 大清一統志順德志參修

星聚山在城西二十八里象山之東高十餘丈周二里其北

為化龍東北為月角郝通志

蓬壺山在城西四十里高約十餘丈周三里廣東輿圖

謹案順德志云郝通志張府志阮通志並為一山與

廣東地輿圖合 大清一統志則云鎮山西南有二

山對峙東曰蓬西曰壺通名蓬壺今採訪冊蓬山自

為一而壺山又分大壺小壺註云大壺俗名棋盤是

蓬壺又析而三矣小壺自屬大壺支脈當從 大清

一統志為定

鎮山今名竈山在縣西南五十里大清一統志

飛鷺山在城西南六十里蓬壺之西南昔黃銘帥鄉人禦黃

蕭養於此其西為萌為獅為鯉魚為蛇為牛南為寶門為拂

袖岡據張府志順德志參修

鼓山鑼山並在飛鷺之南順德志

星槎山在縣西南六十里順德志作城西五十里自新會天河渡海草

鞋洲來有二山西曰星東曰槎通名曰星槎山高約十二丈

周二里據大清一統志順德志參修

獅山一作獅子山與星槎山並在福岸堡西其東為龜為蛇張府志龜

蛇山在福岸東與星槎對峙又為螺為睡牛為金牛順德志

順風一作峯山在星槎之南張府志作西最秀美山麓有冽泉其西

為積岡為葫蘆為大富為陰羅今名楓山北為龍床為象南為木

杓為寶鴨為馮灣為槎灣東為菴主為社主為睡犬為鶴峯

為消息為大岡為豸為象為飛鳳為馬為牛據張府志順德志參修

蓮花山在城西四十五里順風之南高約十餘丈周二里其

狀若蓮花故名其東為定山廣東輿圖

美山在城西南三十五里旁有石孔有聲則風雨作據廣東輿圖黃

通志參修

石龍岡在美山北其下有白蓮池西為參祿為鶴聚為衙南

為鶯為瑞牛順德志

鼇峯山在城西南四十里三華村上有石壁高十餘丈周三

里廣東輿圖

火號山今名煙山在鼇峯之南上有墩其西為榨油為大鶴翎西

北為小鶴翎為周厚據廣東輿圖順德志參修

謹案阮通志附鼇峯火號二山於石龍岡舊志入江

尾堡均誤

中心岡在白藤村其北為馬鞍為葫蘆為鯉魚西為九級地

為大山東為大鷺南為禾倉順德志

謹案張府志白藤堡馬鞍山西為黃桐山今採訪冊

無其名山名隨俗更改與

青霞山在縣西南七十里馬濬村高約十二丈周二里據廣東輿圖順德志參修

圖順德志參修

靈峯山在青霞山之西其西為大田為螺北為獨岡南為茶

山順德志



象山在縣西六十七里大清一統志作縣西六十里其南為仰船岡西臨

仰船洋北為應龍西北為鳳凰北為玉麟洞東北為尖岡據

大清一統志順德志參修

大金山在縣西七十里象山之北東曰獅子嶺臨獅子海西

有石壁曰企阮通志作金犁壁在鬱水中西挹大雁南盡海門北

望海目為一縣之勝據大清一統志阮通志順德志參修

龍穴山在縣西北四十里廣東輿圖作三十五里高十餘丈周二里山

高秀東有獨岡據方輿紀要廣東輿圖阮通志參修

鳳山在龍穴山之南其西為左鳳尾山張府志作左輔東南為鎮岡

又南為獨岡鄉人築壘禦黃蕭養旌為忠義即此順德志

謹案順德志云鎮岡在鳳山鄉人築壘禦黃寇旌為

忠義鄉即此而鼎新堡圖說又云鎮山即黃銘帥鄉

人禦黃蕭養者於龍江堡圖說鎮岡下亦書其事考

鎮山在鼎新堡 大清一統志亦具載之其近鳳山

者實名鎮岡地在龍江堡鄉旌忠義不名鎮山陳志

不能分晰竟以一事兩屬今正之

天湖山在縣西五十二里大清一統志作七十餘里高約三十餘丈龍

鄉志作四周八里上有湖廣數畝黛蓄膏淳被者常至有

小天湖大小盤龍諸峯北為北華據大清一統志廣東輿

鳳凰山在城西北五十四里天湖之東高約十餘丈周三里

廣東輿圖有泉懸出名漱玉旁居人多清節士宋吳貞女即

家此其西為鐵爐岡俗名平頭宋温祕書墓在焉北為睡犬吳貞

女墓在焉又西為鼈魚北華山南為佛子嶺東為滴水巖為

欖園岡東南為蛇嶺而塔石岡則其旁出而別名者也同上

金紫山在城西北五十八里天湖之西高二十餘丈龍山鄉志作三十

十餘丈周四里孤峯突起觀音閣白蓮臺棲其巔列諸廟宇

三面層級而上林木幽邃其南為牛眠為珠璣東為驪東南

為特秀西南為螺為黃松為龍頭西為柏子嶺為常美俗名長尾

為榨油西北為萬松據廣東輿圖順德志龍山鄉志參修

獅子山天湖之東支也其南為大蠶岡又作大嶺東為燕子為蚌

蛇為龜峯為白露嶺東南為大林龍山鄉志

謹案順德志云獅子山城西四十里高十餘丈周圍

三里至天湖則云在城西五十三里今龍山志以為

獅子即天湖之東支相去已十餘里陳志似誤

都甯山在城東北三十里方輿紀要作二十里高約十三丈周三里為

縣北障其下為龍巖峭壁峻嶒左列大石端巖隆重右則喬

木鬱葱有拔地參天之勢南眺魚塘海千頃一碧當風起潮

湧雨過霞飛山光水色氣象萬千西為松排嶺又西為獅嶺

東南為珠岡又南為桃洞方輿紀要作桃岡張府志作桃洞在其陽北為羊化石

又北為滴水巖其陽為鄭公坑宋祥興帝赴海蘇由義奪港

出得趙氏後更名旦集千餘眾圖恢復都於由義所居之西

山逾月旦卒由義葬於山北人呼其地為都甯言趙王所都

永安甯也中有黃姬洞相傳五代時有黃姬避地於此據方輿紀

要廣東輿圖順德志五山志林參修

謹案順德志引黃朝賓考古論云都甯寨在縣東四

十里與紀要輿圖諸書多不合當時實築寨城至今

牡蠣牆基猶在山下有三大忠祠陳志古蹟謂相傳

文信國被執至厓山張宏範挾以北行道出魚塘海

信國之曾否被執至厓山而後北去史無明文然即道出魚塘不過舟楫一經豈沿途皆成古蹟當時經小青口猶有詩可傳而此更寂然陳志似失據

龍頭山又名睡牛在城東北三十里碧江村伏龍浮石温魚獅諸岡又名大皆在村內鎮土在村之南豬頭在村西陳氏崑岡

又在村之西北今於其下設有營汛舊名崩岡順德志

招募岡在赤花村相傳岳武穆命將王貴追討嶺表餘寇曾招募於此舊建有岳王廟潘瑛撰記

飛鷺山在三桂村之西南左為葫蘆右為金牛後為白石又後為仙人為黎地其左為敬止右為大坑順德志

西淋山在城西北八十里方輿紀要黃通志並作縣北五十三里三峯矗起據廣

獅子岡在城東二十里雞洲村外案獅子以形名舊志俗以其上多鴉沿稱老鴉岡順德志

龍隼山在烏洲村

鍾靈山在大洲村高約三丈餘周六百餘丈俱同上

順德周寅清分纂

番禺金佑基初校

番禺史悠乾再校

番禺史悠履三校

番禺金偉基四校

廣州府志卷十終

廣州府志

卷一

四

